

東

華

續

錄

臣王先謙敬編

周潤蕃恭校

秋七月壬子復起彭維新爲左都御史○乙卯以徐士林母病未痊命許容兼管蘇州布政使○辛酉諭各省督撫身任地方皆有父母斯民之責於所屬州縣水旱災傷自應速爲訪察加意撫綏朕前屢經降旨訓示諒督撫等自能仰體朕心不致玩視民瘼稽延時日朕念水旱之災固宜賑救而水爲尤甚旱災之成以漸猶可先事豫籌水則有驟至陡發之時田禾浸沒廬舍漂流小民資生之策蕩然遽盡待命旦夕尤當速爲賑救庶克安全不至流移失所見在成例分別極貧次貧其應行辦賑者原係不待部覆但恐各省辦理不一或仍有拘泥遷延致災民不能及時沾惠者用

是再降諭旨嗣後各該督撫可嚴飭地方官凡遇猝被之水災迅
文申報該督撫卽刻委員踏勘設法賑濟安置一面辦理一面奏
聞務使早沾實惠俾各甯居以副朕憫念災黎之至意儻或怠玩
濡遲致傷民命或有司奉行不力胥役侵蝕中飽以及借名捏飾
浮冒開銷等弊該督撫照例嚴參儻辦理未協積弊未除朕惟於
該督撫是問將此永著爲例○王戌諭昨據參領金珩奏稱八旗
滿洲蒙古漢軍各省駐防官弁子弟離京稍遠應試爲艱請嗣後
科歲兩試令該將軍考試馬步射卽送附近府院考試酌量人數
多寡以定去取等語朕思此事斷不可行雍正十年間曾奉 皇
考諭旨國家之設駐防弁兵原令其持戈荷戟以備干城之選非
令其攻習文墨與文人學士爭名於場屋也在弁兵之子弟有能
讀書向學通曉文義者原聽其來京應試以廣伊等進取之途並

未嘗禁其從事文學今若悉准其在外考試則伊等各從其便競
尚虛名而輕視武事必致騎射生疏操演怠忽將來更有何人充
駐防之用乎况 聖祖仁皇帝臨御六十一年所以教養弁兵者
至周至渥如果應行早已著爲令典又何待今日之喋喋數陳乎
數年以來陳奏朕前者重見疊出不下百餘次其識見甚爲庸鄙
朕恐置之不論未曾降旨申飭乃近日仍有不知而妄演者是以
特行宣諭以覺愚蒙欽此仰見我 皇考睿慮周詳 聖諭至爲
明晰朕臨御以來亦有以此陳奏者槩未准行蓋以滿洲蒙古漢
軍在京者人數眾多就近考試原無礙於操演至各省駐防官弁
子弟爲數無幾若科歲考時不必來京就近在外應試不但事有
難行且必至競尚虛名荒廢騎射殊失設立駐防之本意背謬已
極金珩身爲參領乃煌煌 聖諭豈竟毫無見聞而復混行演奏

著嚴行申飭並將此旨宣諭中外臣工嗣後不得以此謬論再行
妄濶○甲子復設稽查內務府御史○工部尙書趙宏恩以納賄
革職○乙丑調史貽直爲工部尙書高其倬爲戶部尙書○丁卯
命查郎阿入閣辦事湖鄂彌達爲川陝總督以馬爾泰爲兩廣總
督查克丹爲左都御史托時爲漕運總督由戶部侍郎遷○己巳諭周廷
燮奏請蠲除米稅以裕民食朕御極以來加惠民生免賦蠲租不
下千萬計算米糧之稅於國課所增幾何何難槩爲蠲除以廣恩
澤但爲民生計有必須詳加籌畫者蓋各省豐歉不一偶遇歉收
之省除賑恤平糶撫綏安頓外又特免關稅俾客商圖利爭
趨雲集轉運流通此昔日皇考屢行之善政近歲朕踵而行之
具有成效是蠲免米稅實亦救荒之一策也若平時槩令蠲除則
各省地方豐歉盈虛均屬一例富商大賈趨利若然歉收之處與

豐收之處毫無分別國家又何以操鼓舞之權而使商賈踊躍從事於無米之地哉惟是各省情形或朕一時未及周知該督撫等當仰體朕軫念民瘼之意遇地方歉收有藉外省接濟者卽行奏聞免收米稅如情形孔亟奏請需時者卽一面奏聞一面停其輸稅將此永著爲例○辛未以喀爾吉善爲戶部左侍郎由內閣學士選○丁丑大學士尹泰乞休允之○戊寅禮部議准刑部郎中柴鶴山奏科場慎重關防一族之人雖服制稍減而親誼尙存或考官閑文將本族之人取中未免有涉嫌疑請嗣後內簾官子弟及本族之人仍照舊例槩令迴避從之○庚辰原任陝西總督劉於義以徇庇屬員糜費軍需革職○是月貴州總督張廣泗奏古州苗疆自奠定以後各苗皆知畏服而安設軍屯一事實有必應如此辦理之勢今兩廣督臣鄂彌達奏請量移營壘安駐險要擇苗民中

爲眾所信服者設立巡檢頭目以約束之至苗民遺產盡行入官安屯恐日後苗民生齒漸繁地少人多必至怨久亂生且屯兵不能耕作仍須召苗佃種其役使凌虐勢所不免等語查該督臣從前請將古州鎮遷設丙妹八寨協移駐爛土汎或荔波縣清江協移駐天柱縣各處均係彈丸之地不能安駐鎮協大營見在新疆以內所有營汛不甚聯絡之處俱請添設汛防又於天柱荔波等處酌量增駐官兵防維周密苗人必不敢再滋事端至苗蠻向無酋長雖有本寨中之强有力者一二人亦不能約束其眾况苗類眾多統以文武鎮以官兵尙敢羣起跳梁又豈一二巡檢頭目所能約束再屯兵之設乃係逆苗內之絕戶田產始行入官其未絕者仍令各本戶照前耕種並未一槩歸屯且新疆未墾之地甚多雖此後苗民生齒日繁亦不至無以資生原不必以日後之地少

人多爲慮其招墾屯戶均係人才壯健可充屯軍者令其承領不許倩人佃種而所設屯田已飭令與苗田標明界址以免攬越侵占並無召苗耕作之事惟所奏屯軍凌虐苗民實爲目前第一要事查苗疆驟安屯軍至八九千戶之多而苗民經懲創之後其勢易於欺凌見已嚴行查禁並擬酌定章程以爲永遠遵守得旨旣經卿詳悉敷陳知道了至新疆何處安設屯軍何處仍係苗田何處爲聲勢相聯之鎮協卿其明悉爲圖以進朕將覽焉

八月癸未 上御經筵○錄用賢良祠大臣子孫○甲申諭御史王峻參奏彭維新一案經九卿兩議上請朕交與大學士等議今議稱彭維新身在制中聞命之後違制到任應照後議革職等語彭維新朕素不知其人御極之初曾有言其人材可用者朕因伊係 皇考舊臣所犯罪案尙有可原之情與涂天相張楷俞兆晟

等俱加錄用未幾伊卽以親喪回籍近因左都御史缺員朕以彭維新服制已滿例應起復原官是以降旨補授亦未有在朕前薦揚之者今經御史參奏大臣等議以革職乃屬循照常例但當時大臣官員在任守制者頗有之卽如彭維新此等情節者亦不止伊一人可將大學士九卿等所議原摺暫行存貯至彭維新之爲人朕究未甚知其從前丁憂後到任之處朕更無從得聞仍著來京候朕召見再降諭旨○乙酉諭御史嵇魯奏稱八旗生計艱難請每旗各設一庫每庫用銀五十萬兩借與本旗官員以及包衣兵丁每月每兩令出利銀二分計年終之時每庫可得利銀十二萬兩以五萬兩歸還庫帑餘銀七萬兩散與本旗兵丁十年以後帑銀歸完卽將此項銀兩永作八旗公庫等語朕御極之初加恩借給旗人庫銀本期有益生計乃邇年以來細加體察知伊等所

領銀兩隨手花費每月扣除額餉於生計轉覺艱難是以降旨豁免未完之項停止再借所降諭旨至爲明晰而稽魯復有此奏是誠何心且資本必須營運方能獲利旗人辦事當差日不暇給何術而能坐獲二分之厚息乎原不過隨手花銷而按季按月交納利銀將受永遠無窮之剥削是非欲以厚其生計而轉以朘其膏脂此富豪盤剝小民之計而稽魯反以爲養贍資生之良策悖謬極矣又奏稱八旗生齒日繁與其多設養育之方無如廣開登進之路凡近京省城府道州縣副參遊守等官俱宜參用滿洲京營遊守千把俱以滿洲補用滿洲之人農工商賈俱非所習除居官爲兵外別無資生之策等語國家分職授官量材器使必其人之克勝厥任方可擢授年來滿洲中堪任外官者朕未嘗不量行擢補然不可定爲成例蓋八旗官員文則六部院等武則都統參佐

員缺甚多材畧儘可施展遵循舊例爲官擇人尚恐人材不足何必更開外用之途且其意以登進之路爲養育之方尤不可訓文武員弁原藉以分猷宣力爲國爲民今因資生無策優以官爵將居官者惟利是圖安望其潔已奉公實心任事乎况員缺有限而生齒日繁以此爲養贍之法豈非妄亂之甚乎又奏請鑄當十錢每錢一文重四錢當小錢之十見今制錢之五大錢四十文得銅一斤則錢價浮於銅價盜銷之弊可不屏自除並請復設錢行經紀等語錢法一事屢經條奏定議自當漸次清楚若改鑄大錢銅質輕而獲利厚盜鑄之源自此而開奸民私毀制錢改鑄大錢盜銷之弊自此益熾於錢法有益乎無益乎至經紀蠹役經御史條奏革除稽魯又請招募此招募之人能必其卽愈於所革之人乎彼所奏三摺持論悖謬妄欲變亂成法今畧撮其大要宣示於眾

稽魯著交部嚴加議處○丙戌諭朕聞本年七月有飛蝗從江南
海州禮堰集飛入山東鄰城縣界約長四五里寬二三里不等山
東官員督率民夫竭力撲捕旋卽飛去未曾傷及田禾朕思飛蝗
成陣至數里之廣旣從江南飛來而總督那蘇圖並未具摺奏聞
則地方官之怠於撲捕可知可卽寄信詢問那蘇圖令其明白回
奏凡督撫膺封疆之重寄原以惠養百姓爲地方第一要務若舍
此而言辦事則其所留心者不過末節耳今年江南久旱不雨計
地亦廣朕心憂灼無一刻去諸懷抱屢降諭旨多方籌畫而那蘇
圖並未先期經理亦未將實情詳悉奏聞今具摺爲朕躬祝壽又
無一語及地方情形其玩視民瘼顯然可見朕以乂安萬姓爲心
豈有因壽誕之月而暫忘閭閻休戚之理如果經理得宜民人得
所則仰慰朕懷所以爲朕祝釐者莫大於此若或以萬壽屆期不

奏及旱潦等事以爲寬慰朕懷則尤不知朕心不識大體之甚者矣似此識見朕深爲兩江地方憂慮可將此一併曉諭那蘇圖知之○丁亥修南北樓道○命酌定各省緩徵錢糧分別帶徵○己丑諭今日雅爾哈善奏參御史邱玖華條奏九卿各部及督撫等議事不公一摺之外臣聞外人傳說邱玖華另有一摺請將賢良祠大臣之子孫錄用見交大學士密議尙未覆奏而邱玖華輒向人傳說且邱玖華乃勵宗萬之門生久在伊家居住勵宗萬之祖係入賢良祠者故教邱玖華上請以冀復用又恐止此一事或啓形迹之疑故以議事不公等項漫無實據之套語將內外大臣籠統參論以形其剛直不私之槩而以此摺並進名爲條陳公事實欲起用勵宗萬等語朕恩加恩賢良祠子孫者不過因其家見無出仕之人或給以虛銜或予以微秩亦視其人才尙可錄用然

後酌量加恩以示優禮耆舊之意豈有身爲侍郎之人緣事獲罪
因其父祖在賢良祠而即可復用之理勵宗萬雖至愚亦計不出
此至於參奏九卿議事不公一摺實切中時弊近日九卿辦事每
多瞻顧廢弛如伊摺中所奏情節諸臣見之各當深自慚恧倍加
儆省若更遷怒於建言之人則全不知愧恥者矣朕意雅爾哈善
向在辦理軍機處行走明係伊探聽邱玖華摺奏賢良祠之事而
反坐邱玖華以自行宣洩之名以博九卿之歡心不然必九卿中
有一二不端之人欲中傷邱玖華而示意於雅爾哈善令其參奏
不然縱邱玖華自行宣洩彼係疏遠新進之臣何以知交大學士
密議尙未覆奏耶此風斷不可長所當究問明晰以示儆戒如邱
玖華條奏果有情弊或自行宣洩則自有應得之處分乃雅爾哈
善巧詐居心希圖陷害邱玖華以取悅眾人其情實屬欺罔其罪

更重雅爾哈善著解任此事著莊親王平郡王大學士九卿詹事科道秉公詳確嚴察議奏○建甘肅擺羊戎土城增設兵弁○庚寅工部議准貴州總督張廣泗奏黔省地方鎮遠以上自昔不通舟楫查自都匀府起由舊施並通清水江至楚屬黔陽縣直達常德又由獨山州屬之三腳埡來牛古州抵粵西屬之懷遠縣直達粵東乃天地自然之利請在各處修治河道鑿開繩路以資輓運而濟商民從之○癸巳設各部院督催所○丙申以納爾泰爲內閣學士由光祿寺卿遷○戊戌諭朕覽王大臣等所議雅爾哈善參奏邱玖華一摺全未盡心據雅爾哈善原奏內稱御史邱玖華奏九卿各部及督撫等議事不公一摺奉旨交議越數日臣聞外人傳論云邱玖華是日另有一摺請將賈良祠大臣之子孫錄用交大學士密議尙未覆奏而邱玖華輒向人傳說等語此數語究係出

自何人之口並未究詢不知爾等所審者何在又雅爾哈善在爾等前供稱陳履平向我說邱玖華另有請用賢良祠大臣之子孫一摺本意專爲起用勵宗萬我問此事大約是揣摹之言勵宗萬做過大臣如何因此便得復用陳履平云此事紛紛傳爲笑談如何是揣摹之言等語勵宗萬身爲侍郎豈有因賢良大臣之子孫便復官之理此朕前日所降之旨而雅爾哈善捏稱爲與陳履平問答之詞藉爲枝梧之計詐僞顯然若從前果有此語則其心疑而不信矣旣疑而不信安得有此參奏之舉以此詰問伊斷無辨處爾等並不置問何也王大臣等皆屢經審訊重大案件之人豈竟見不及此耶雅爾哈善種種應行詰問之處俱含糊了結而將一傳說浮話之陳履平與雅爾哈善一體議以革職明係見朕嚴飭雅爾哈善欲治其罪而爾等遂遷怒於陳履平也且雅爾哈善

雖革去文官尚有武職陳履平一經革職便屬齊民輕重失倫莫此爲甚王大臣等如此辦事殊非朕委任之意姑念此案尙非必應徹底窮究之事特降旨曉諭俾各倣省雅爾哈善著革職並將佐領革去陳履平著交部議處○己亥 上以世宗憲皇帝三週年恭奉 皇太后謁 泰陵啓鑾○壬寅 上謁 泰陵○癸卯 上詣 泰陵行三週年祭禮奉 皇太后回鑾○甲辰減直隸正定府城河地畝額賦並免逋賦○乙巳以奉天山東豐收淮海運至天津平糶○丙午 上奉 皇太后駐蹕南苑 上行園九月庚戌朔 上自南苑奉 皇太后還宮○濬江南甘泉泰州支河○癸丑以劉吳龍爲左副都御史由通政使遷○乙卯諭本年江南旱災除免漕外額糧均准折徵○丙辰給造犯攜眷口糧○丁巳定湖南湘鄉瀏陽湘陰等三縣額賦比照長沙縣則例徵收歲

減額徵銀二萬一千九百六十四兩有奇○辛酉諭原任大學士白璜向在巡撫任內有清廉之名告休之後緣事革職今聞病故著給遷大學士職銜以示優待舊臣之意○壬戌免山東雍正十三年民欠○癸亥諭大學士嵇曾筠在浙年久今海塘工程漸次就緒著入閣辦事永定河工關繫緊要嵇曾筠熟諳河務到京之後往來河干指示機宜於河道自有裨益至伊辦理海塘數年經畫得宜著有成效著交部議敘○裁浙江總督復設巡撫仍歸閩浙總督管轄○以福建總督郝玉麟爲閩浙總督調盧焯爲浙江巡撫以王仕任署福建巡撫喬學尹署福建布政使○甲子直隸總督李衛參奏總河朱藻挾詐欺公貪殘虐民各款得旨解任命訥親孫嘉淦往鞫以顧琮管總河印務○丙寅命籍隸大興宛平科道迴避巡城○丁卯諭總督太監等毛團永泰張明慤格胡世

傑奏事太監王常貴張玉柱劉萬春張玉擅與李衛交談伊等身
係內監如何可與總督聚語李英謝成在旁親見不行管束亦與

李衛接談王守貴係伊等首領全然不知管教著將王守貴從重
治罪李英謝成及奏事太監四名一併議罪具奏小太監等每人

重責四十板○戊辰以沈起元爲河南按察使由江西驛道遷○壬申

上御懋勤殿召到雲南貴州四川廣西情實罪犯諭大學士等

曰凡此小民陷於罪戾大都由飢寒切膚及教化未逮而然我君

臣皆任其責豈能無愧若不於萬無可貸之中求一綫之生路朕

心實有所不忍所當原情察理審度再三固不可有姑息之心尤

不可無哀矜之念必求生不得然後置之於法則死者毫無遺憾

而刑法得其平矣○甲戌諭尹泰耆舊老成宣力年久 皇考選

拔於退休之後屢加擢用淳厚綸履甯靜和平奉職維謹去年伊

子尹繼善來京陛見朕因尹泰年已衰邁留尹繼善在京授爲刑
部尚書以便朝夕奉養伊旋以老病乞休朕慰留再三始允所請
今夏舊病復作特賞太醫診視冀其痊可今聞溘逝深爲軫悼已
命散秩大臣率領侍衛賜奠茶酒著加太子太傅於應得卹典外
加祭一次以示優禮舊臣之至意尋予謚文恪○乙亥浙江海塘
工竣○吏部議准湖廣總督宗室德沛奏寶慶府屬城步縣距靖
州甚近請改隸靖州寶慶府理猺同知原管綏甯武岡城步新甯
等州縣請將城步綏甯二縣分令靖州州判管理加理猺字謙歸
辰永沅靖道轄其寶慶府理猺同知止管武岡州新甯縣猺務從
之

冬十月庚辰朔命查直隸渠淀毋許民間私築埂壩○免直隸江
蘇安徽被災州縣逋賦○辛巳諭向令各省督撫保薦所屬教官

者原爲其文品兼優才能出眾是以加恩格外以優待之爲督撫者當存慎重之心方不負國家甄別人才之典乃數年以來各督撫舉薦來京引見者未見有卓越之才猶幸所舉不多尙未至於大濫惟尹會一張楷二人到任未久而舉薦之員多於他省此不過冀屬官之感激稱頌遂輕忽以從事也如此次張楷所舉之侯執信乃由署知縣題請改補教職者則其人之才具可以槩見尹會一所舉之葉徵麟乃從下第舉人中揀選發往者若論俸次則應升知縣之期尚在十數年之後張楷尹會一將此等人保薦冀邀逾格之恩甚屬不合著交部議處以爲沽名市恩者戒俟執信葉徵麟著回原任不准帶領引見○辛卯 上奉 皇太后幸甯壽宮視 皇次子永璉疾是日 皇次子永璉薨輟朝五日○諭二阿哥永璉乃皇后所生朕之嫡子爲人聰明貴重氣宇不凡當

曰蒙我 皇考命爲永璉隱然示以承宗器之意朕御極以後不卽顯行冊立皇太子之禮者蓋恐幼年志氣未定恃貴驕矜或左右諂媚逢迎至於失德甚且有窺伺動搖之者是以於乾隆元年七月初二日遵照 皇考成式親書密旨召諸大臣面諭收藏於乾清宮正大光明扁之後是永璉雖未行冊立之禮朕已命爲皇太子矣今於本月十二日偶患寒疾遂致不起朕心深爲悲悼朕爲天下主豈肯因幼殤而傷懷抱但永璉係朕嫡子已定建儲之計與眾子不同一切典禮著照皇太子儀注行元年密藏扁內之諭旨著取出將此曉諭天下臣民知之○甲午諭據漕運總督托時奏稱戶部尚書高其倬舟抵寶應縣病劇身故高其倬係宣力年久之大臣今節用來京中途溘逝深爲悼惜其柩櫬回旗著沿途文武官弁護送照看尋子祭葬謚文貞○召寶啓瑛來京以方

顯爲四川布政使

由貴州按察使遷

○乙未

皇太子金棺發引

上幸

擷芳殿賜奠○丙申調任蘭枝爲戶部尚書趙國麟爲禮部尚書史貽直爲刑部尚書以趙殿最爲工部尚書調楊永斌爲吏部右侍郎由禮部調○丁酉謚皇太子永璉爲端慧皇太子○李衛因病解任以孫嘉淦署直隸總督○庚子諭士子以品行爲先學問以經義爲重故士之自立也先道德而後文章國家之取士也黜浮華而崇實學我朝養士已將百年漸摩化導培護甄陶所以期望而優異之者無所不至爲士者當思國家待士之重務爲端人正士以樹齊民之坊表至於學問必有根柢方爲實學治一經必深一經之蘊以此發爲文詞自然醇正典雅若因陋就簡止記誦陳腐時文百餘篇以爲弋取科名之具則士之學已荒而士之品已卑矣是在各省學臣諄切提撕往復訓勉其有不率教者卽嚴加

懲戒不少寬貸至於書藝之外當令究心經學以爲明道經世之
本其如何因地制宜試以經義俾士子不徒視爲具文者在學政
酌量行之務期有益於膠庠各省亦不必一轍我 皇祖御纂經
書多種紹前聖之心法集先儒之大成已命各省布政司敬謹刊
刻聽人印刷並准坊間翻刻廣行恐地方大吏不能盡心經理則
士子購覓仍屬艱難不獲誦讀著督撫藩司等善爲籌畫將士子
應讀之書多爲印發以爲國家造士育才之助○免福建臺灣鳳
山等廳縣額徵社餉減徵臺屬各縣曠番地貼餉銀之半○壬寅
上幸田村賜奠 端慧皇太子○甲辰命江南招商接濟災區

○乙巳諭李衛才猷幹練實心辦事封疆累任宣力多年勇往直
前無所瞻顧畿輔重地正資料理前聞患病沈重准其解任調治
特遣太醫診視頒賜藥冀其痊可今聞溘逝深爲悼惜著侍衛

往奠茶酒柩櫬起程之日除該省官員照屬員之禮奠送外其經過地方文武官員在二十里以內者俱差人護送照看出境所有應得卹典該部查例具奏尋子祭一次造墳立碑謚敏達○實授孫嘉淦直隸總督以甘汝來爲吏部尙書楊超曾爲兵部尙書安圖署廣西巡撫嚴瑞龍爲湖北布政使彭家屏署湖南按察使由

隸清河道署

○調呂耀曾爲倉場侍郎陳世倌爲戶部左侍郎○丙午

實授顧琮直隸河道總督

十一月己酉朔諭大學士尙書內原品休致大臣著給食全俸將此永爲定例從前已降諭旨若自行奏請朕加恩准令原品休致者著卽照此旨給食全俸其遇京察自陳朕加恩准令原品休致者著該旗該部查明應否准食半俸之處具奏請旨若非自行奏請朕特旨令其原品休致者及遇京察自陳部議致仕人員不必

給食俸祿至於八旗武官具呈告退俱有量其軍功給食俸祿之例嗣後一二品武職大臣若自行奏請朕加恩准令原品致仕者著該旗將伊軍功及食俸年分查明或給食全俸或給食半俸之處具奏請旨若非自行奏請朕特旨令其原品致仕者不必給食俸祿○吏部議准兩廣總督鄂彌達等奏廣東瓊州府孤懸海外北與雷州府相近米穀貨物俱賴雷州販運接濟向有巡道一員統轄二府權其緩急隨宜料理雍正八年分肇高廉羅道轄之高廉二府雷瓊道轄之雷州一府添設高雷廉巡道一員駐紮高州改雷瓊道爲海南道止轄瓊州一府駐紮瓊州不特控制難周卽瓊民日用亦多未便請復海南道爲雷瓊道改高雷廉道爲高廉道各兼兵備道職銜從之○壬子諭直隸河工自應總督會商總河辦理前著李衛不必辦理者以伊等彼此不和於公事無益故

耳今孫嘉淦並不似此著仍照舊例亦兼管河工事務○乙卯
上幸田村賜奠 端慧皇太子○諭軍機大臣等每科主考差往
各省彼此督撫有無餽送路費向無定例其數目之多寡亦無成
規伊等回京時有奏聞者有不奏者亦不盡一自應酌定一例俾
永遠遵行庶無輕重不均之事今朕酌量道途之遠近分別路費
之多寡雲南八百兩貴州七百兩四川廣東廣西福建湖南六百
兩江南浙江湖北江西陝西五百兩河南山西山東四百兩爾等
可寄信各督撫遵照此數不得以私意增減主考等亦不得於此
數之外更有所受將此永著爲例○丙辰實授阿克敦工部右侍
郎○己未鑲黃旗漢軍都統納穆圖等奏請年羹堯之子孫年秀
等可否准其考試當差得旨年羹堯乃叛逆不臣之人蒙我 皇
考施恩念伊曾在青海著有微勞因將伊子孫發往極邊煙瘴者

俱赦宥回京已屬格外之恩今伊等呈請考試當差該旗都統等
遞行奏請甚屬錯謬著將原摺給還○癸亥命八旗包衣歸漢軍
考試○丁卯命修福陵石隄○裁河南山東漕糧十萬石留貯
津倉續賑平糶○吏部議准閩浙總督郝玉麟奏閩省霞浦縣屬
桐山地方襟海環山離縣窵遠控制難周請建立縣治所有霞浦
近桐之八都至二十四都民屯田畝額徵銀米撥歸新縣管轄從
之命縣名曰福鼎○己巳吏部議准廣西巡撫楊超曾奏廣西泗
城鎮安二府應各添設附郭縣從之命泗城縣名曰凌雲鎮安縣
名曰天保○庚午准河南祥符等三十三州縣額徵匠價攤入地
糧○大學士嵇曾筠以病乞回籍允之○吏部議准甘肅巡撫元
展成奏蘭州會請移駐知府以符體制應將臨洮府知府及附
府狄道縣移駐蘭州原駐蘭州知州移駐狄道同原轄之金縣河

州渭源俱隸移駐省會之知府轄鞏昌府屬靖遠縣改隸移駐蘭
城之知府軸從之○壬申甯夏將軍阿魯奏甯夏地震水涌新渠
寶豐縣治沈沒發蘭州庫銀二十萬兩命兵部侍郎班第馳往賑
恤○甲戌命中書助教等官中式准留原任○飭辦賑州縣侵漁
入己者擬罪不得援減○乙亥給河東管河佐雜官養廉○吏部
尚書性桂乞休允之○朝鮮國王李吟請頒明史朝鮮列傳允之
○丁丑免直隸宣化各府州屬逋賦及旗退入官地畝租賦○戊
寅立算學○大學士管川陝總督查郎阿奏章嘉胡圖克圖奏請
將裏塘巴塘佳塘等處賞給達賴喇嘛經議政大臣會同部臣密
議可否給還或有無不便情節令臣悉心籌畫並咨商雲南總督
慶復妥議具奏本年五月謹就微臣意見將不便之處具奏蒙頒
諭旨達賴喇嘛用度不敷著於打箭爐所徵稅銀內每年給銀五

千兩在案茲據慶復議覆滇省所屬中甸與川省裏塘巴塘佳塘等處情勢相同從前未歸內地之時頗多不便歸滇以後設弁管轄迄今甯謐應將裏塘巴塘佳塘並中甸等處照舊各歸川滇未便仍給達賴喇嘛管理與臣前奏意見相符得旨所議是知道了十二月己卯朔調訥親爲吏部尚書以鄂善爲兵部尚書調喀爾吉善爲吏部左侍郎轉申珠渾爲戶部左侍郎調留保爲戶部右侍郎由禮
右調○辛巳定雲南煙瘴官三年俸滿例○癸未移江蘇劉河舊城於茜涇增崇明鎮兵弁○召戴永椿來京以孔傳煥爲江蘇按察使兼署布政使由江南鹽
驛道遷○乙酉命尚書鄂善議政處行走○丙戌諭前左都御史缺出朕因彭維新係服滿候補之員將伊補授嗣御史參奏大學士等以伊服內不應到任議令革職朕以素日不知彭維新之爲人諭令來京再降諭旨今彭維新到京

奏稱雍正十三年十月十三日命臣署理左都御史臣以未經到任則終制下忧難於仰達是以於十月十八日到任隨繕本奏想終制等語彭維新於十三日奉旨署印之後十八日未到任之先曾經謝恩奏事並非未到本任卽不能奏達終制下忧者何得引此以卸己過至伊被參之後雖聞召旨亦應在籍具奏辭職今親自來京而辭職之語亦甚泛泛是其戀職之心顯然可見著照大學士等原議革職其左都御史員缺著魏廷珍補授○除湖南芷江縣加攤糧銀○戊子除湖北房縣保康二縣及河南省雍正十二三年虛報地畝額賦○甲午諭守令爲親民之官最關緊要而邊疆之地民夷雜處撫綏化導職任尤重更不得不慎選其人以膺牧民之寄查雲貴諸苗向在王化之外爲害地方近來改土設流漸次安輯然瘡痍初起元氣未復必得循良之員恩信兼著調

割咸宜者令其心志帖服然後可以久安無事近時督撫於苗疆重地多擇能員以資彈壓殊不知矜才喜事之輩飾文貌以欺耳目圖聲譽以求升遷非有實心實政以爲撫綏化導之本究於苗疆無所裨補夫苗夷雖極頑悍然亦具有人心非不可至誠感動者果得廉靜樸質之有司視同赤子勤加撫恤使之各長其妻孥安其田里俯仰優游一無擾累諒無有不可以革面革心者嗣後遇有苗疆要缺應令該督撫慎選賢員以居其任三年之後察其漢夷相安羣情愛戴者保題升擢以示優獎其有恃才貪功者雖有才幹不得輕任以滋事端其如何定例之處著九卿妥議具奏至於文武不和乃地方之大患其在苗疆更宜嚴禁而重懲之嗣後若有懷挾私意彼此齟齬致誤公事者該督撫提臣卽行題參從重議處毋得姑容○除貴州思南等府縣虛報地畝額賦○八

旗通志成○丙申諭向來四川火耗較他省爲重我皇考暨朕
陸續降旨裁減已去其半無非加惠小民使比戶受輕徭薄賦之
恩也今聞該省耗銀雖減而不肖有司巧爲營私之計將戥頭暗
中加重有每兩加至一錢有餘者彼收糧之書吏傾銷之銀匠又
從而侵漁之則小民受剝削之害不小矣川省如此他省可知著
各省督撫轉飭布政司遵照徵收錢糧之天平法馬製定畫一之
戥飭令各州縣確實遵行仍不時密行稽查儻有絲毫多取者卽
行嚴參治罪毋得姑容如或失於覺察該督撫藩司不得辭其咎
○革朱藻職○以梁詩正爲內閣學士由翰林院侍讀學士遷○戊戌發帑
銀一百萬兩修濬江南水利命大理寺卿汪漋前往督辦○王大
臣等議覆履親王允祿等奏定 端慧皇太子安葬塋地一切典
禮 端慧皇太子吉兆應尊稱圍寢造享殿五間兩廡各五間大

門五閒琉璃花門三座燎鑪一座覆以綠瓦題主時禮節敬擬牛
一羊二奠用爵讀文致祭嗣後祭祀儀與妃圍寢同從之○準
噶爾台吉噶爾丹策零遣哈柳等隨侍郎阿克敦等奉表至京表
曰準噶爾台吉噶爾丹策零具奏恭進大皇帝聖明去年令達
什等以阿爾台遊牧事具奏奉大皇帝諭旨爾請喀爾喀與厄
魯特以阿爾台山爲界俱照見在駐牧無相掣肘言辭恭謹朕甚
嘉之故復遣使前往幸蒙聖恩疊允不勝懼忭又諭旨有云
分界之處尙未指明蒙古遊牧無定若不指定山河爲界日後邊
民生繆於久遠之計仍無裨益前者我遣吹納木喀具奏亦正爲
此耳今議定界請循布延圖河南以博爾濟昂吉勒圖烏克克嶺
噶克察等處爲界北以遜多爾庫奎多爾多輝庫奎至哈爾奇喇
博木喀喇巴爾楚克等處爲界我邊界人等仍在山後遊牧不得

越阿爾台嶺其山前居住蒙古部人止在扎卜堪等處遊牧彼此相距遼遠原可兩無牽涉謹此具奏前者彼此致生嫌隙止以

大皇帝兵至科布多遂於界內築城駐兵之故今托爾和等處恐復如此惟 大皇帝區處若蒙見允邊界自此而定卡倫大半向前其布延圖托爾和一卡倫並在我國境中亦祈 大皇帝垂鑒

再車臣汗告我使人班禪額爾德尼已經圓寂詢來使云是實我厄魯特經典中載班禪額爾德尼乃掌教大喇嘛也如果圓寂當建塔諷經意欲遣我人赴藏布施以廣黃教以福羣生奏入報聞
○庚子諭前據總督張廣泗參奏張照在黔糜費軍需銀兩摺內特標百萬軍需於前而下文參其任意支領是顯然軍前所用錢糧皆張照經手之項是以朕降旨令其賠還十分之八後又有人奏稱張照經手錢糧止派發各府銀十三萬兩之數此外與伊無

涉朕令戶部行文張廣泗確查具奏今據張廣泗查奏張照經手
錢糧止發過銀二十五萬餘兩是此數與原奏迥不相符且遲至
二年之久始行覆奏顯有迴護原參礙難措辭之處張照在黔辦
理軍務與哈元生等意見參差不能和協朕是以降旨撤回加以
處分又因張廣泗有糜費錢糧之參奏是以照例責以賠補並非
從前深惡張照而於不應著賠之項罰金以懲之也今細覽張廣
泗查奏之摺是張照本無應賠之項何得強令賠還朕惟以大公
辦理天下之事初無成見成心並非此時嘉獎張照而欲枉法以
寬之也若照戶部所議復令張廣泗再查伊仍不免瞻顧難於回
覆此案交與辦理軍機大臣秉公妥議具奏○丙午準噶爾使臣
哈柳等入覲諭曰去年爾來使達什等齋噶爾丹策零奏章言詞
恭順朕故遣使往諭此次所奏乞令托爾和布延圖兩處卡倫稍

稍內移此事斷不可行使與不便爾等亦知之且我聖祖皇帝時所設卡倫至今豈可移動乎但噶爾丹策零所云遊牧不敢越阿爾台尙近於理念爾等遠來召爾入見若噶爾丹策零止請彼此不越阿爾台此次便可定議乃復言及卡倫故朕令大臣等與爾再議爾爲噶爾丹策零大宰桑爾台吉本意爾無不知除所奏外尙有口屬之言否哈柳奏云並無口屬之言但前者以大皇帝之兵於科布多築城駐兵致起鬱端今噶爾丹策零之意以托爾和布延圖離科布多甚近恐日後復於兩處築城駐兵故奏請乞恩耳 上諭曰見今噶爾丹策零所奏不使遊牧卡倫越阿爾台甚屬信實朕甚嘉之至托爾和布延圖等處朕已降旨斷不修築城屋駐紮兵丁朕爲中外共主所諭豈有改變之理爾等還其詳記朕旨曉諭噶爾丹策零哈柳奏言祈 大皇帝以所降諭旨

繪寫特遣使臣往與噶爾丹策零面議 上諭曰無庸遣使爾等起程時另有敕書卽付爾等頒示噶爾丹策零○丁未直隸總督孫嘉淦奏禁止燒鍋侍郎方苞又申前議且謂直隸山東見今奉行未聞民以爲病欲將南北各省俱行禁止並欲禁止種煙經大學士等議覆無論豐年各省一體通行嚴禁卽宣化之苦高粱山陝之棗柿葡萄等物亦不許復用釀酒種煙之地自乾隆四年爲始悉令改種蔬穀種煙之人照私開燒鍋例治罪臣閱邸鈔中心駭懼卽以直隸而論前督臣李衛任內一年拏獲燒鍋蹕翹三百六十四起人犯一千四百四十八名臣抵任一月拏獲燒鍋運販七十八起人犯三百五十五名凡此特申報總督衙門者耳各府州縣自結之案尙不知凡幾特拏報在官者耳吏役兵丁已拏而賄縱得規禮而不拏者尙不知凡幾特酒犯之正身耳本地之鄉

保鄰甲沿途之腳夫店家牽連而受累者又不知凡幾一省如是
別省可知酒禁如是煙禁可知煙酒之禁果行四海之內一年之
閒其犯法之人破產之家不可勝計矣以飲食之故舉萬千無罪
之人驅而納之桁楊墜楚之下果欲建萬世之長策致吾君於堯
舜似不應爲此言也見今直隸大小衙門皆有封貯之酒與酒及
器具變價之銀未變之酒棄之則可惜貯之則無用賣之則失體
已變之銀或欲以賞民役或欲以修衙署或欲以充公費官吏兵
役虎視眈眈以拏酒爲利藪百姓嗷嗷弱者失業强者犯令十百
成羣肩挑背負鹽梟未靖酒梟又起山東之事臣不詳知直隸情
形則所目覩若謂煙酒可以永禁而百姓因此感悅臣實不敢爲
此飾說也夫天下事爲之而後知履之而後難從前禁酒禁麴之
議不惟大學士九卿等俱屬紙上空談卽臣言宜於歉歲不宜於

豐年猶是書生之謬論身親辦理逐案發落乃知奪民之貲財而狼藉之毀民之肌膚而敲朴之取民之生計而禁錮之饑餓之餘民無固志失業既眾何事不爲則歉歲之難禁似更甚於豐年周禮荒政舍禁去幾有由然也書曰無稽之言勿聽謂立言而必有事以證之也今大學士及方苞等所議皆係空言不適於事臣不敢復以空言指駁謹將直隸燒鍋躉麪一切案件撮其條目繕呈御覽此則信而有徵之事非臣所能臆造也得旨此奏朕俱悉矣但將此發議於國體甚有關繫朕自有酌量也○管蘇州織造郎中海保遵旨覆奏蘇州巡撫許容從前厯任俱有刻薄之名觀其到任以來操守廉潔精細明白實心任事聲名亦好得旨此奏至公之論也○是歲朝鮮琉球安南來貢

臣王先謙敬編

周潤蕃恭校

乾隆四年己未春正月己酉 上御乾清宮西暖閣召王大臣翰林科道及督撫學政在京者九十九人賜宴賦柏梁體詩 御製序曰我 皇祖聖祖仁皇帝 皇考世宗憲皇帝嘗集在廷諸臣於乾清宮肆筵設席授以筆札 御製首唱羣臣以次遞成效漢代柏梁之體續虞廷賡歌之義光垂奕世猗歟盛矣朕敬承不緒惟日孜孜期與百爾羣工共圖治理言念股肱之佐卿尹之班何一非我 祖考所貽以與朕寅亮天工者哉宗室屏藩之寄則又雪盈疇已兆二夢之稔光風應律初回大地之春爰集王公卿貳派衍天潢分所宜親也宜有以篤親親之情敘堂康之誼乃者臘

授几賦詩一如舊制朕非欲誇詞藻以耀羣臣倡爲豐亨豫大之說也思祖考遺朕以昇平之業吾君臣何幸得優游以享之夫享昇平匪艱而保昇平爲難羣臣其體朕意焉一宴會之樂尙思繼祖考之庥祖考之良法善政布在方策吾君臣其何以立綱陳紀熙績甯人以觀揚祖考之光烈乎羣臣其體朕意焉○王子載留江蘇漕糧二十萬石備賑○召張鳴鈞來京調范璫爲直隸布政使以朱定元爲河南布政使原任浙江海防道○癸丑命通政使德爾敏往江南同大理寺卿汪灝督辦水利○乙卯軍機大臣議奏張照在黔糜費軍需一案經總督張廣泗確查除發過軍需賑務銀二十五萬六千餘兩外餘皆存貯道庫提解藩庫實無應賠之項請免查追從之○庚申諭工部侍郎王絅前以年老乞休朕未允允今又閱三年看伊精力較前不逮准以原品致仕○辛

西 皇四子永城生○甲子轉張廷璵爲工部左侍郎起韓光基
爲工部右侍郎原任工部侍郎○壬申命趙國麟爲大學士調任蘭枝爲
禮部尙書以陳惠華爲戶部尙書梁詩正爲刑部右侍郎由內閣學士遷
○癸酉諭大學士嵇曾筠才品優長老成練達久任河道總督懋
著勤勞繼膺浙督之命經理海塘工程漸次就緒朕心嘉悅念其
外任多年宣召入閣辦事旋聞身患痰疾精力衰頹特遣伊子嵇
璜回南省視並頒浸藥准其回籍調養以俟痊可入都嗣聞病勢
加劇正遣太醫馳往療治不意溘焉長逝深爲傷悼其應得卹典
該部查例具奏外著加贈少保加祭一次以示恩禮大臣之至意
尋予謚文敏○丁丑減浙江嘉興等七縣額賦

二月己卯

上御經筵○許容丁憂調張渠爲江蘇巡撫以馮光

裕爲湖南巡撫陳惠榮署貴州布政使宋厚署貴州按察使由古州道

○壬午諭戶部所奏各旗省虧空入官未變價之房產德明等五案俱著給還昔我皇祖臨御六十餘年政崇寬大而內外臣工奉行不善怠玩成風遂致辦事暗藏弊端國帑率多虧空我皇考欲正人心風俗之大綱有不得不釐剔整頓之勢此乃出於萬不容已者迨經理十餘年後人心漸知畏法風俗亦覺改移以時勢觀之可以施惇大之政朕是以將厯年虧空之案其情罪有一綫可寬者悉予豁免卽已經入官之房產未曾變價者亦令該管衙門查奏給還在此時之臣工受朕寬宥之恩未嘗不感激歡欣俯仰舒暢殊不知從前虧空之所由來皆因心無顧忌不復知有法網以致由小而大由寡而多日甚一日本身旣獲重罪子孫猶被餘殃其害有不可勝言者矣古人云漸不可長欲不可縱朕看今日內外臣工見朕以寬大爲治未免漸有放縱之心卽如今

日工部奏 太廟慶成燈一事遂大有浮冒而工部司官營私作弊之事屢經提督衙門奏參則其他衙門與此相類者正恐不少謂之無弊可乎國家動用錢糧如果有益於兵民卽數百萬金亦所不惜若被官吏侵漁私入囊橐卽纖毫亦不可假借此防微杜漸之道也况在京職官俱已加添雙俸外省大小官員又皆給與養廉伊等養贍之資較從前已覺寬裕不應更有營私作弊之念自罹罪謫如果能奉公守法將來國用充足朕何難再爲加恩奈何不免爲清白以受天家優渥之澤而貪圖一時之小利置身家性命於不計乎總之朕施寬大之政而諸臣亦當行謹飭之心諸事秉公絕去弊竇則可以成朕寬大之治而長享福慶於無窮若因寬成玩故智復萌則姑容於此日者朕必綜覈於將來卽朕之子孫亦必無聽其玩法欺公不加重懲之理是不肖臣工縱能僥

俸於一時仍不能脫然於身後人非至愚亦當猛省及此況我
皇祖 皇考之寬嚴相濟乃審時度勢至當不易之成憲後世子
孫豈能外此以求治天下之道乎古人云水至清則無魚人至察
則無徒此言在上者當如此存心耳若人臣不知謹守繩墨而欲
以此爲自便之術則諸弊滋長國法廢弛又豈可以爲訓乎將此
曉諭內外大小臣工共知之○命給入閩士子炭○丁亥諭朕昨
閏工部月摺內辦慶成燈領銀三百兩錢二百串等語朕因工部
工程近來每有冒銷之弊看來此燈不過畧爲黏補修理何至用
銀如許之多且朕恭祭 太廟時見燈穗顏色俱已不鮮是以降
旨令工部堂官詳查具奏今據工部查奏內稱新造慶成燈發過
銀三百兩錢二百串係豫領之項俟報銷時將應找應繳之處覈
實准銷等語凡有工程例應先估後領豈可一任司官圖領侵漁

縱有繳還亦不過因朕降旨查察比尋常多交數十兩豈有將大半繳還之理明知浮冒始令查奏該堂官等竟以朕爲不諳事務並不據實查奏任意飾詞蒙混甚屬乖謬著將工部堂官等交部嚴加議處○己丑以蔣溥爲內閣學士由翰林院侍講學士遷○丙申賜琉球國王尚敬御書扁額○免湖廣永順永綏新闢苗疆鹽課○免浙江上虞等縣積欠○庚子賜準噶爾台吉噶爾丹策零敕書曰前歲爾遣達什等進奏言辭恭順朕甚嘉之因分界之議未曾指定地名故朕又命侍郎阿克敦等前往與爾分別定議今爾遣哈柳同來疏言今欲定界請循布延圖河南以博爾濟昂吉勒圖烏克克額噶克察爲界北以遜多爾庫奎多爾多輝庫奎至哈爾奇喇博木喀喇巴爾楚克爲界厄魯特無踰阿爾台嶺蒙古亦止在扎卜堪游牧伏乞大皇帝睿鑒夫定界之議非自今始爾父策

妄阿喇布坦已經陳奏誠以喀爾喀游牧原無定處必指定山河
爲界庶彼此不致紛爭朕爲天下共主無分畛域一視同仁凡有
奏請可行則允之不可行則卻之雖百請亦不允也爾言厄魯特
無過阿爾台游牧其言近理朕卽信之又請蒙古止居扎卜堪見
今蒙古游牧原未嘗踰扎卜堪也爾又請托爾和無築城駐防朕
旣降旨撤兵托爾和等處安得復如前此科卜多有築城駐兵之
事已面諭爾使哈柳矣必無改悔之理也但爾請循布延圖河南
以博爾濟等處北以遜多爾庫奎等處爲界謂卡倫大半向前布
延圖托爾和兩卡俱在爾國界中意欲我卡倫稍向內移此必不
可行之事爾豈不知乃復牽率而言乎况設卡防守所用不過數
人何關輕重然自我聖祖時設立之卡倫豈可於今忽移動之
乎夫休兵息民永歸和好卽定界與否亦非要事但使彼此游牧

互相隔遠卡倫則安設如故至科布多並不復駐兵止於每年應
畧地時各遣二三十人前往巡視約不相害如此區處爾之猜疑
亦可盡釋矣台吉其遵旨定議俟覆奏到日朕當明諭喀爾喀令
其游牧永遠無過扎布堪也如是則事體詳名彼此均有裨益此
外更無應行另議之事朕故不復遣使卽以敕書付哈柳齋往台
吉其熟思之如遵朕旨則遣使覆奏不然數遣使何爲爾又奏稱
班禪額爾德尼圓寂欲遣人往藏諷經布施伏乞鑒允朕爲大君
有能奉教之人豈忍阻抑但從前爾部人潛往西藏殘害土伯特
今若經行彼地土伯特懷憤生事亦未可定爾誠心布施須俟遵
旨定議後准用百人赴藏朕當特遣官弁護送隨敕賜各色段十
端○乙巳准舉人會試後揀選知縣○丙午江南河道總督高斌
奏清口於明成化閒立廟祀張將軍祥今奉漕船賞資佑助請賜

封號尋賜號曰彭靈衛漕之神

三月辛亥 上親耕耤田○壬子欽差侍郎班第奏甯夏地震所屬新渠寶豐率成冰海不能建城築堡仍復舊規請將二縣裁汰分別加恩寬恤從之○丁巳免湖南苗犯婦女發遣邊外○戊午命鄂爾泰勘江南新運口並查災賑○吏部奏請行取直隸等省知縣二十一員得旨依議朕恭閱 皇祖實錄內載康熙二十九年吏部以行取知縣事照例請 旨欽奉 諭旨行取知縣以科道用者甚多科道職任闕繁要著九卿各將平昔所知學問優長品行可用者秉公舉奏尋據尚書都御史侍郎等於部屬知縣內舉出十二人彼時奉 旨彭鵬邵嗣堯陸隴其趙蒼璧俱著以科道用此次考選至今稱爲得人今屆行取之年各部屬州縣內如陸隴其彭鵬等治行卓越者諒不乏人著尚書都御史侍郎遵

照康熙二十九年之例各將平日確知之員秉公保舉候朕簡用
此外例應行取之處仍照常舉行○庚申吏部奏工部辦理慶成
鑑未行估計先給銀錢應將不據實覈減又查參不實之工部堂
官尙書來保等分別降調得旨近來工部諸事懈弛該部司員筆
帖式等凡遇一切工程俱欲侵扣作弊皆由堂官等平日不留心
查察之所致俱應照議降級調用但一時降調多人衙門無人辦
事來保韓光基俱著照部議所降之級從寬留任阿克敦著銷去
加一級抵降一級免其降調來保仍罰俸五年韓光基阿克敦仍
罰俸三年趙殿最因在侍郎任內歷俸年久是以升授尙書乃伊
任事以來一切事務毫不盡心辦理有負朕簡用之恩趙殿最著
照部議降一級調用王紘著銷去加二級紀錄四次免其降去頂
帶三級○諭近來看得各部院辦事漸覺懈弛天下之事整飭難

廢弛易凡人之心敬畏難放縱易卽常存敬畏之心猶恐不無疏忽若一放縱則不知何所底止爾等部院堂官各有表率司員稽查書吏之責卽極力防範尙且弊竇難除若云書吏不能保其無弊是開以徑路教之作弊矣夫營私受賄爾等堂官料無此事朕亦不疑爾等至此但司官書吏得錢作弊卽是爾等不能稱職爾等皆係 皇考簡用大臣先年辦事何等謹慎今朕待以寬大所以存君臣之體爾等因此遂萌懈弛之念是以朕之心爲心卽不以 皇考之心爲心矣若必待朕訓飭一番始知暫時儆惕此乃書吏小人之習爾等大臣不宜存是心也前大學士趙國麟曾奏稱六部滿尙書都好漢尙書猶有不能稱職者朕看來滿尙書雖不能如舉夔稷契實在尙好漢尙書朕卽不能全信如史貽直任蘭枝畧看情面之事朕不能保其必無吳應棻查審鄂彌達一

案雖未必有受賄之事然不免瞻徇情面將來審明自見近來外省督撫衙門事件各有章程尙能整飭而各部事件或駁或准多有講究保舉司官亦多瞻徇此斷斷不可者又聞得近日外城司官多飲酒宴會卽堂官亦頗有此事殊屬非宜今日處分工部兩案來保不過無能其心無他尙可從寬趙殿最由侍郎擢用尙書乃並不寔心辦事是以照議處分爾等嗣後當各自猛省小心謹慎約束屬員稽察書吏儻再漫不儆惕因循瞻顧朕必重加處分不能爲爾等寬也○甲子諭在京各部院之弊多由於書吏之作奸外省有一事件到部必遣人與書吏講求能飽其欲則引例准行不遂其欲則借端駁詰司官庸懦者往往爲其所愚而不肖者則不免從中染指至於堂官事務繁多一時難以覺察且旣見駁橐亦遂不復生疑以致事件之成否悉操於書吏之手而若輩肆

行無忌矣朕思此等弊端在京難於查察而在外省則情節顯然某事用銀若干某項係何人經手或督撫著人料理或藩臬等著人料理而督撫亦未有不知者使爲督撫者嚴正持躬深知大體不爲宵小之所搖惑而遇有部書需索之事卽據實奏聞置之於法則若輩知所畏懼而舞文弄法之風可以漸息昔我 皇考時整飭百度各督撫等又仰體 聖心直達無隱幾於風清弊絕朕御極以來政尚寬大若輩故智復萌督撫藩臬等以爲所費不多何必與之較量止圖案件之完結遂樂爲應付而不惜甘爲容隱而不言無怪乎奸胥猾吏以詐騙爲得計視國法如弁髦也內部之書吏索之督撫而督撫應之則彼此效尤無所底止必致督撫之書吏索之司道司道之書吏索之府縣層累而降受其害者仍在吾民也蓋未定養廉以前外官尙有贏餘以供意外之費旣定

養廉以後更無餘費以應苛索不取之百姓將誰取乎各督撫均
有激清吏治移易風俗之職任豈可視為相沿陋規而躬自蹈之
以爲官吏之倡貽閭閻之困乎嗣後著嚴行禁止藩臬以下經手
之案著督撫嚴查禁約儻書更有仍前需索者督撫卽時奏聞如
有不遵朕旨私相授受者必將與受之人照枉法贓治罪督撫容
隱不奏亦必嚴加議處各省關差鹽政織造提鎮等官俱著照此
旨一體遵行再朕聞得各省織造解送段疋於內庫該庫官每疋
秤較其分兩稍有不足則繳回不收而重者則置而不論此卽需
索之一端夫段疋成於眾手豈能輕重得均畧無差少若此件不
足彼件有餘卽不得謂之分兩不足矣嗣後交納之時當合總秤
其輕重不當每疋秤較若合秤不足方許繳回將此永著爲例○

丁卯准河南運漕道遠州縣折漕耗米○命吏部尙書公訥親協

辦大學士○戊辰特免直隸江蘇安徽三省額賦共二百五十萬兩○己巳諭聞浙江敷文書院內生童讀書者眾多每歲帑金租息銀四百餘兩不足以敷餉廩著加賜帑銀一千兩交與該撫經理歲取息銀以資諸生膏火○庚午諭科道爲朝廷耳目之官必知無不言隨時獻替方有裨益於政治近來科道官員條陳甚少卽有一二奏事者亦皆非切當之務無關輕重卽如鄉會試之夾帶文字殿試之呈送領聯朕皆得之訪聞而科道官並未有陳奏及此者殊有愧言官之責著傳旨申飭並通行諭知嗣後務各清白乃心公直自矢毋蹈穢默陋習以副朕簡用言官之至意○諭趙之坦自簡任副都御史以來毫無建白人亦平常鴻臚寺少卿田懋前爲科道時尙屬敢言不愧臺諫之職著從優升授副都御史其鴻臚寺少卿員缺著趙之坦降補○嚴武闈臨場關防○命

鄉會試內簾頒發 御纂經書○壬申以陳大受爲吏部右侍郎

由內閣學士遷

○乙亥諭向來殿試策中俱用領聯以致士子得以豫先

撰擬致滋弊端况士子進身之始而卽習爲獻諛之詞尤非導之
以正古人對策中無此體裁也今當殿試之期朕親製策問之題
不拘舊式以免諸生豫先揣摩諸生策內不許用四六領聯但取
文理明通敷陳切當不必泥於成格限於字數此次試期已近儻
有不畫一之處亦不以此爲去取臨期有告病託故不到者著禮
部奏聞

夏四月己卯兵部等部題浙江布政使張若震奏各省衛所守備
千總照山東等省之例改歸知府管轄行令各督撫查覆據覆奏
除山東山西湖北湖南江蘇安徽已歸知府管轄貴州新設各衛
已歸同知通判管轄無庸議外直隸延慶一衛雖順天所屬而府

升非知府可比應由霸昌道管轄天津左右二所已歸知府其通
州左右二所並無附近知府仍歸通永道管轄甘肅安西沙州柳
溝靖逆四衛赤金一所仍歸安西靖逆兩廳管轄江西南昌等五
衛吉安等四所改歸知府管轄四川雷波衛黃鄉所改歸敘州府
管轄凡督催督緝稽察催徵交代等項悉照知府與州縣之例議
敘議處至衛備與廳員仍照舊定儀注行從之○以徐士林爲江
蘇布政使原任河南布政使○辛巳賜莊有恭等三百二十八人進士及
第出身有差○癸未諭朕御極以來仰體 皇考誠求保赤視民
如傷之至意廣諮博訪庶幾民瘼得以上聞至於水旱災荒尤關
百姓之身命更屬朕心之所急欲聞知而速爲經理補救者是以
數年中頒發諭旨不可勝數務令督撫藩臬等飛章陳奏不許稽
遲亦不准以重爲輕絲毫粉飾儻或隱匿不陳或言之不盡朕從

他處訪聞必將該督撫等加以嚴譴蓋年歲豐歉本有不齊之數
惟遇災而懼盡人事以挽之自然感召天和轉禍爲福若稍存諱
災之心上下相蒙其害有不可勝言者是以孜孜不怠惟恐民隱
不能上達卽天下想亦洞悉朕心矣乃昨冬甯夏地動災傷甚重
朕聞奏卽特遣大臣馳驛前往會同該地方官逐戶賑濟安插撫
綏毋使一夫失所且不惜帑金數百萬兩以爲招集流移繕完室
廬之費此皆明降諭旨者彼時都統弘昇奏稱甯夏地動情形發
鈔時宜從簡畧恐有好事小人借端捏造煽惑愚民等語此奏識
見甚屬褊小朕不以爲然但其中有軍機要務恐似此傳播於外
之語足以朕令內閣識之蓋謂國家政務原有極應密之件如事
關軍機查拏要犯皆不可不密以防洩漏別生事端至於旱潦饑
饉災祲之類則斷斷不應密卽數十年來亦從無刪減情節發鈔

者乃內閣誤將弘昇此奏傳播於外一似朕愈允彼言者近日朕始聞知因思此奏傳播各該督撫等必致錯認以爲朕心諱言災傷始而觀望繼而欺隱則黎元將何以得受國家賑恤之恩耶是朕力行而猶恐未逮者將轉而爲改絃易轍之舉豈朕之初志耶夫民瘼所關乃國家第一要務用是特頒諭旨通行宣示嗣後督撫等若有匿災不報或刪減分數不據實在情形者經朕訪聞或被科道糾參必嚴加議處不少寬貸○免直隸本年地丁耗羨○甲申大學士議覆食侍郎俸方苞奏遵旨選擇時文告竣請頒御製序文標名欽定四書文從之○乙酉諭南方號稱水鄉長江大湖洪濤巨浸每遇風浪驟發人力難施向有設立救生船之處每年頗多救濟但恐經費不足則爲數無多而稽查未周則爲善不力著各省督撫確查所屬地方有險扼之處應設救生船隻

者酌動存公銀兩估計修造每年給與水手工食若干並交與地方官載入交盤冊內永遠遵行毋許始勤終怠○丙戌以旱申命求言○丁亥諭大學士趙國麟向有足疾不能騎馬著坐車進紫禁城到內閣辦事○戊子命刑部清理庶獄減徒以下罪○九卿科道等遵旨覆奏雨澤偶爾愆期 聖朝實無闕事臣等奉職無狀嗣後當益勵恪勤得旨覽卿等所奏謂近日政務實無闕失可以指陳朕自維卽位四年以來朝乾夕惕無非以愛養民生爲念凡有利民之政無不興舉害民之事無不革除寤寐焦勞惟恐一夫不獲其所今爾等以爲事事合乎天理當乎人心在朕心猶不敢自信卽爾等所奏雖皆引咎自責亦屬空言無補時政目下直隸望雨甚殷聞得江南亦在缺雨直隸上年亢旱雖不如江南之甚而收成亦屬歉薄儻今歲更復亢旱將來兩省民食作何區處

此不可不豫爲籌及者也朕之用人行政實具苦衷多有非臣工所能深喻者如元展成隆昇張照諸人或言其不可復用抑思元展成當年爲貴州巡撫苗疆用兵非其專責時張照董芳哈元生等意見齟齬元展成於中辦理不能妥協是以加之處分然伊任內猶無大過故復用爲甘肅巡撫隆昇在浙人多言其刻薄如辦理海塘工程應發價一萬兩者止給發五千兩若果如是程元章豈有不據實奏聞之理今朕用爲福州將軍乃係管兵武職未嘗任以地方之事也張照辦理苗疆調度失宜以致獲罪但伊原係書生不諳軍務今復用爲學士亦止令司文墨未嘗加之重任凡此諸人若因其小眚遂致廢斥卽見在諸臣任內多有處分之案儻皆棄而不用則天下豈有如許可用之全人乎至朕擢用之人或有言其太驟者又云不宜總督之任者始用爲尙書不知朕之

用人自有權衡深意內外職任互相調用原欲令其厯練政務非
有所輕重於其間也且如錢法一事向謂不宜禁銅乃銅禁既開
而錢價轉昂則又有以爲銅禁宜嚴者朕思此時若再禁銅或致
滋擾是未收禁銅之利而先受其害矣凡爲此等議論者皆由小
臣識見拘墟不能深悉朕用人行政之苦衷耳科道職居言路尤
宜一秉虛公遇事直言如果有當言之事自應隨時入告何待朕
言黨實無可建白雖經朕訓飭亦不必勉強塞責乃自數月以來
敷奏寥寥及朕明降諭旨始有陸續條陳者覈其所言又皆不切
政務率多摭拾浮詞假公濟私居言職者顧當如是乎他若翰林
郎中參領等官朕皆令其條奏原欲兼聽並觀有裨庶政乃舉行
至今鮮有關繫國計民生實可見諸施行者甚且以朕加恩之事
謂爲已所陳請邀譽於人或留中未發又以爲嘉謨碩畫情未施

行是以朝廷耳目之寄而爲伊等擅竊威福之資是不開言路不可而聞言路又轉滋弊端將如之何而後可耶凡此皆有關於人心風俗朕爲天下元后普天率土皆屬子臣而人心風俗之浮濶無非朕一人之責也卽今在廷諸臣雖無罔上行私之弊而於門生故舊瞻徇在所不免亦非公忠體國之道人非聖賢誰能無過但有過貴於能改朕無事不以至誠待人爾等亦當以朕之心爲心君臣一德交修不違人事旣盡庶可感召天和目下直隸江南兩省望雨情形甚爲急切儻甘霖早沛收成可望尙屬無虞如雨澤再愆大關民食不可不爲先事綢繆之計爾等當悉心籌畫將如何可以有備無患之處詳加酌議據實具奏○裁直隸正定府木稅○乙未以陳世倌爲左都御史由戶部左侍郎遷○白映棠因事解任以李珣爲山東按察使○以許希孔爲內閣學士由少詹事遷○丁

西禁江西龍虎山正一真人傳度○己亥以畿輔缺雨仍弛奉天
米船海禁○辛丑命培築北運河隄壩○癸卯飭直隸江南捕蝗
○甲辰截留南漕十萬石貯天津北倉○駐藏侍郎杭奕祿奏西
藏西南三千里外巴爾布部有三汗一名庫庫木一名顏布一名
葉楞雍正十二年曾遣使恭請聖安近年三汗彼此交惡數尋
戰攻臣遣貝勒頗羅鼐宣諭聖上好生之德中外一視各宜息
兵和好仰報國恩三汗歡欣聽命以三部落戶口數目呈報並
各進方物奏聞部議加恩賞賚從之

五月丙午朔申諭收恤養濟院貧民○辛亥刑部議准本部郎中
樊天游奏南北兩監各省解到軍流人犯妻孥並遣飲泣吞聲殊
堪憫惻請嗣後強盜減等及情罪重大者仍全案發遣其餘軍流
人犯或父母年衰家無次丁願留其妻侍奉者准其免僉如父母

已故毋得槩行准免從之○給各倉監督養廉○轉王鈞爲戶部左侍郎調梁詩正爲戶部右侍郎以田懋爲刑部右侍郎王安國爲左副都御史由左僉都御史遷○丁巳諭朕御極以來廣開言路擴充

見聞倣效古帝王詢於芻蕘之意原期有益於國計民生是以於大臣九卿科道外並准部屬參領及翰林等俱得具摺奏事以收明目達聰之效乃行之年餘伊等條奏雖多殊無可採或迂闊而不達事情或瑣屑而無關治體又其甚者假公濟私挾嫌施巧俱難逃朕之洞鑒朕誠恐顯加申飭有妨言路閒或留中不發而伊等每揚言於外以爲嘉謨碩畫惜未見之施行甚且以朕所用之人冒稱爲己之薦引朕所斥之人冒稱爲己之參劾種種作威作福搖惑眾聽以致外間人言藉稽科道等屢行奏聞夫古人所謂詢於芻蕘者蓋以卑近之論亦足以備採擇並非置是非公私於

不問而使之各逞臆說無所忌憚也卽如今日正白旗佐領鄂岱本係不應奏事之人越例奏事而所言又極卑鄙荒唐朕已發與八旗大臣閱看鄂岱摺內有請瞻仰天顏等語是伊本意不過以條奏爲名希圖召見以僥倖於萬一耳近來諸臣奏事者其意大率類是若行之日久毫無裨於國政徒有害於人心不可不防其漸著將部屬參領及翰林等官條奏之處仍照例停止○戊午諭方苞在 皇祖時因南山集一案身罹重罪蒙 恩曲加寬宥令其入旗在修書處行走效力及 皇考卽位特沛殊恩准其出旗仍還本籍又漸次錄用授職翰林晉階內閣學士朕嗣位之初念其稍有文名諭令侍直南書房且升授禮部侍郎之職伊若具有人心定當痛改前愆矢慎矢公力圖報效乃伊在九卿班內假公濟私黨同伐異其不安靜之痼習到老不改眾所共知適值伊以

東華錄卷一百一十一
襄病請解侍郎職任朕允之仍帶原銜食俸上年冬月因伊條奏事件朕偶爾召見一次伊出外卽私告於人曾在朕前薦魏廷珍而參任蘭枝以致外閒人言藉藉經朕訪聞令大學士等傳旨訓飭伊奏對枝梧朕復加寬容未曾深究近訪聞得伊向住魏廷珍之屋魏廷珍未奉旨起用之先伊卽移居城外將屋讓還以示魏廷珍卽日被召之意又庶吉士散館屆期已將人數奏聞內閣定期考試矣伊復於前一日將新到吳喬齡一名補請一體考試朕心卽疑之今訪聞得伊所居之屋卽吳喬齡之產甚覺華煥顯係受託爲之代請似此數事則其平日之營私可以槩見方苞深負國恩著將侍郎職銜及一切行走之處悉行革去專在三禮館修書效力贖罪其武英殿事務著陳大受劉統勳管理○命挑陶莊引河○庚申諭天道福善禍淫書曰作善降之百祥作不善降

之百殃此乃萬世不易之理從未有諂媚鬼神而即可以避災獲
福者無如小民知識短淺往往惑於鬼神之說祈求禱祀爲費不
貲雖仰事俯育之謀皆所不計而其中最爲耗蠹者則莫如越省
進香一事其程途則有千餘里以及二三千里之遙其時日則有一
月以及二三月之久初春前往春暮方歸以鄉農有限之蓄藏
坐耗於酬神結會之舉以三春最要之時日消磨於風塵奔走之
中朕聞直隸山東山西陝西等處風俗大率如此而河南爲尤甚
自正月至二月每日千百爲羣先至省會城隍廟申疏焚香名曰
掛號然後分途四出成行結隊填塞街衢樹幟揚幡鳴金擊鼓
冠緇衣前導引男女雜還奸良莫辨鬪毆拐竊暗滋事端此等
劣習在目前則耗費錢財而將來卽恐流於邪教惟是相沿已久
若驟然加以懲治未免又多擾累著各省督撫訪察所屬有越省

進香者善爲曉諭化導徐徐轉移俾知惠迪吉從逆凶之正道時存善心勉行善事必蒙神祇默佑况神靈隨處降格不必遠求卽欲奉佛酬願亦止於本境祠廟虔誠行之毋得呼朋聚眾跋涉山川以致誤農耗財漸成人心風俗之害○甲子諭九卿會議事件皆係該管衙門主稟眾人不過於事情大槩略加參酌卽行定議畫題而主稟衙門之堂官亦不過將大旨說與該司官員書吏創立底稿稟成之後但觀其大意無差錯處便翠相畫諾至文理之通順與否皆置之不問矣卽如大學士鄂爾泰查勘河工一案據奏稱新運口可用不必仍開舊口惟新口之外挑水壩稍短應再築長壩似屬穩妥等語此指運口而言也又稱新運口內頭壩二壩三壩向東轉北卽天妃閘舊運河路自三壩向東南灣轉而北過越閘爲新河頭舊河直捷新河糾折爲漕運計應行舊河今新

建閘壩見俱未開仍取道天妃閘既屬便利永宜遵行等語此指運河而言也運口運河原屬判然兩事乃九卿會議本內全係照覆而其措詞則云請飭河道官員不必仍開舊口所有應接築長壩務令堅牢寬圍過水口如磨盤破式至重運糧船惟期直捷爲便今新河既屬糾折應令河臣照大學士所議嗣後糧艘應行舊河仍取道天妃閘以利輶運等語九卿此議於事原無錯誤而運口運河分晰不明此行文牽混不通之所致也朕於河工形勢深爲究心而又細閱本章方知其因文掩意若他人觀之必疑其前後矛盾矣夫撰文乃辦事之一端尙文詞固不得爲實心辦事若並此亦不留意則其苟且塞責更可槩見傳之天下後世甚有關係九卿中多有科甲翰林出身者於此等文義模糊豈有不能看出之理總之忽略遷就習爲固然嗣後當切加倣省毋蹈前轍

除將議覆河工之本發還改正外將此曉諭九卿知之○乙丑諭
前朕降諭旨蠲免直隸本年錢糧九十萬兩江蘇一百萬兩安徽
六十萬兩隨據孫嘉淦具摺請將直隸耗羨一併蠲除朕降旨允
行復經陳世倌援照直隸之例請免江南耗羨朕敕交廷議旋據
議稱此次蠲免乃係特恩非被災可比應不准免耗羨且江南耗
羨節年不敷今若再行蠲豁則地方應用公費益致缺乏應毋庸
議朕降旨依議今據那蘇圖等奏稱此次蠲免仍因上年被災而
施恩澤應請一體蠲除耗羨以廣皇仁等語從前陳世倌具奏時
朕以伊身在京師南北隔越所奏不過遙度之詞廷議既引定例
覆奏遂降依議之旨今那蘇圖身在地方目覩民間情形亦復如
是陳請諒非市美邀名之舉且朕愛養黎元輸將多減一分閭閻
即多受一分之益著將江蘇安徽二省所蠲正賦之耗羨一體免

徵以示格外加恩之意又據直隸布政使范璨奏稱直隸公用不
敷查河南耗羨見餘銀四十餘萬兩若動撥十萬兩以協濟直隸
則更多益寡於公事有裨等語此奏見交部議朕思江南蠲免耗
羨之後若官員等養廉不足則河南多餘之銀亦可通融撥補總
之以天下百姓之物力仍還之天下百姓一時權宜行之不必過
存畛域之見其撥補若干之處著該部定議具奏○戊辰命浙江
海甯縣改築石塘○辛未諭馬齊在 皇祖時卽簡任機務倚毗
甚殷及 皇考卽位特命總理事務嘉予勞績賞給伯爵世襲罔
替朕卽位之初伊以年老力辭解退朕重違其請允致仕頤養
高年以示優禮耆舊之意念伊厯相三朝年逾大耋抒忠宣力端
謹老成領袖班聯名望夙重舉朝大臣未有若此之久者前聞在
家患病卽命太醫加意調治繼聞病勢沈重朕本欲躬親看視因

值齋戒之期不獲前往特頒諭旨備述前後情事命和親王大阿哥永璜公訥親前往代朕親行並賜帑金經理後事今聞溘逝朕心深爲震悼已命和親王大阿哥永璜公訥親等往奠茶酒其應得卹典該部察例具奏外著加贈太傅加祭一次以昭恩禮尋予謚文穆○癸酉諭朕御極以來內外大臣中數人實能體朕敬

天勤民之心輔弼贊襄抒誠宣力有功於社稷有益於蒼生勞績懋昭宜加優獎大學士伯鄂爾泰張廷玉大學士福敏俱著加太保大學士徐本查郎阿吏部尚書公訥親俱著加太子太保吏部尚書甘汝來戶部尚書海望兵部尚書鄂善刑部尚書尹繼善尚書銜徐元夢直隸總督孫嘉淦雲南總督公慶復俱著加太子少保

六月戊寅諭軍機大臣等往昔帝王之治天下每有沙汰曾道之

令誠以縉黃之流品類溷雜其閒閉戶潛修嚴持戒律者百無一二而游手無藉之人借名出家以圖衣食且有作奸犯科之徒畏罪潛蹤倖逃法網者又不可以數計夫一夫不耕或受之飢一女不織或受之寒天下多一僧道卽少一力作之農民若輩不耕而食不織而衣且甘食美衣公然以爲分所應得不知愧恥是以上農夫二三人內袒深耕之所入而不足以給僧道一人之用旣耗民財復溷民俗在國家則爲游民在佛老教中亦爲敗類誠不可聽其日引日多而無所底止也惟是此教流傳已久人數繁眾一時難以禁革是以朕令復行頒給度牒使目前有所稽查將來可以漸次減少此朕經理之本意也今禮部頒發各省度牒已三十餘萬張此領度牒之本僧各准其招受生徒一人合師徒計之則六十餘萬人矣目下亦止得照此辦理但朕查外省官員情形不

過循照部文敷衍了事蓋未深知朕漸次裁減之本意爾等可密寄信與各督撫令其徐徐留心使之日漸減少需以歲月不在取必於一時若官吏奉行不善致滋擾累則又不可○庚辰召法敏來京調碩色爲山東巡撫以方顯爲四川巡撫高山署四川布政使由大理寺少卿署○辛巳命安徽修水利○壬午添派查旗御史○戶部侍郎申珠渾以徇私革職○乙酉諭朕愛養黎元有應行減免之賦稅無不查明豁除以紓民力今聞陝西醴泉縣舊額實徵糧二萬四十二石九斗零順治十三年清丈時因弓口窄小積有餘地加算糧二百五十六石二斗一升零後遂造入全書著爲定額其實有糧無地小民輸納維艱著該督撫出示曉諭從乾隆四年爲始將此項永遠寬免俾百姓均沾實惠○盛京工部侍郎希德慎以辦理城工遲延巧飾具奏降調○調岱奇爲戶部左侍郎杭

奕祿爲刑部右侍郎由工
右謂○丁酉諭旨我

皇考惠愛商民恐州

縣牙行歲有增添以致奸棍把持爭奪抽分利息爲閭閻之擾累
於雍正十一年特頒諭旨令直省督撫飭令藩司因地制宜著爲
定額報部存案不許有司任意增添止許將額內各牙行退帖頂
補之處查明換給新帖再有新開集場應設牙行者酌定給帖報
部不許濫增所降諭旨甚爲明晰近聞江蘇各省於額帖之外陸
續請增者一縣竟有數十張以至百餘張不等必州縣官員才
識短淺聽信胥吏播弄借新開集場准其增添之例或舊集而捏
爲新設或裁牙而潤詳改充徒使貿易小民受其苛索莫可申訴
江蘇如此則各省亦必皆然著該部卽通行各省督撫轉飭布政
使將朕此旨出示曉諭該地方果有新開集場應設牙行者該印
官詳確查明取具印結由府州覈實詳司給發牙帖如非新開集

場而蒙混請添者卽行題參從重議處儻有仍前滋弊失於查察
者朕必於該督撫藩司是問○辛丑轉任懋爲刑部左侍郎調韓
光基爲刑部右侍郎由工調

東華續錄

乾隆十

臣王先謙敬編

周淪謹校

秋七月乙巳朔諭甘肅秦安等十五州縣閒被冰雹無論已未成災恐免本年額賦○丙午轉阿克敦爲工部左侍郎以索柱爲工部右侍郎由內閣學士左副都御史遷○戊申倫達禮因病解任以張嗣昌爲福建按察使由四川鹽茶道遷○乙卯命工部侍郎索柱仍兼內閣學士以雅爾圖爲左副都御史由戶部郎中遷○以許希孔爲工部右侍郎由內閣學士遷○丙寅諭各省府州縣官員均有守土之責不宜輕離職守每聞督撫等遇有公事輒將地方官或調至省城辦理或調赴他府辦理動經數月不同本任且一府之中竟有將郡守牧令全行調辦者如此則本地事務必致廢弛於守土之義大乖謬嗣後

督撫等各宜留心若遇緊要公事不得不調員辦理之時則酌量慎重然後檄委勿使守牧縣令等官全離本地致有顧此失彼之慮再者閩廣向來風氣屬貢之於上官以趨謁承奉爲能而同寅之中又以宴會酬酢相尙以致廢時失事耗費物力於無用之地此亦有關於吏治地方者朕屢經訓飭聞馬爾泰到任之後粵省漸知悛改而閩省舊習則未全除爲此再加訓諭嗣後儻有屬員無故赴省干謁上司或留連宴集忽視政務者經朕訪聞必加以嚴譴○諭吏部尙書甘汝來持躬端謹辦事恪勤久經外任賢聲素著自簡任尙書以來實心供職正資倚用今聞患病溘逝深爲軫惻聞其家計寒素且無經理後事之人著賞帑銀一千兩派該部司官代爲料理命散秩大臣一員帶領侍衛十員往奠茶酒應得卹典著查例具奏尋子祭葬謚莊恪○以郝玉麟爲吏部尙書

調宗室德沛爲閩浙總督以班第爲湖廣總督

由兵部侍郎遷

○戊辰以

雅爾圖爲兵部侍郎舒赫德爲左副都御史

由內閣侍郎遷

○庚午論

大學士等據慶復張允隨奏稱安南奸人自稱交江王見今棄眾

投誠傾心向化彼在交國雖有應得之罪而天朝固無不徧之仁

投訴卽難盡信輸情自有可矜除安插頭目解散兵眾招撫錢塘

餘黨及咨安南等一應事宜俟臣等查明再行具摺恭請聖訓外

理合先將交賊投誠情形奏聞等語朕思安南爲我朝外藩素常

恭順與内地無異今彼國奸人忽思搆撥生亂且捏稱天朝有兵

相助更爲悖逆前次慶復等移文該國王諭以天朝必無助奸人

以兵而加於百年臣服藩封之理此處辦理甚是今摺內忽稱出

具榜文開賊生路賊遂連遣兵頭求降董芳照依榜文許以不死

並邀賊首釋眾親來交賊遂解散餘黨止留親兵三百在馬郎三

五

百屯馬鞍山一百到界河率領頭目十二人親詣邊營叩懇投誠
並呈其上世圖冊董芳等犒以酒食暫安置營內等語據此是安
南之叛民該地方官已准其投誠而容納之矣計算奸人糾集不
及千人且離滇界甚遠以安南兵力不難擒其首惡而散其黨羽
所以不卽遣兵者料聞奸人天朝助兵一語不敢不稍存觀望耳
今天朝旣容其投降則安南自不能過問爲彼國王計將何以辦
理設使安南國王以爲納彼國之叛覓彼國之仇竟行詰問該督
等又將何詞以對且與從前行文之意不自相矛盾耶此事辦理
之處於情於理均屬不合可卽馳信與慶復等就見在辦理情形
悉心妥議務有以服安南國王之心而不失統御外藩之大體不
可希圖省事苟且完結也○王申諭據河南巡撫尹會一奏稱今
歲豫省地方六月以後陰雨連綿房屋傾圮糧價較前頑長請將

捐監事例照江南被災州縣減三收捐向來豫民食用所需全資
小麥今麥價較穀價爲貴折中定額每穀一石折麥八斗爲率如
減三收捐請准穀麥兼收應捐穀一石者收麥八斗糶借之時卽
可米麥並用於民食更有裨補等語從來養民之道首重積貯而
積貯之道必使百姓家有蓋藏能自爲計庶幾緩急可恃雖遇旱
澇可以自存不致流離失所若百姓毫無儲蓄而事事仰給於官
無論常平等倉見在未能充足卽使充足矣而以有限之穀給無
窮之民所濟能有幾人又如荒歉之歲督撫等動以截漕爲請殊
不知天庾所關甚重若非萬不容已豈可輕動况以經制之漕糧
而供各省之動撥其不敷應用更爲人人所共知者去年尹會一
曾奏麥收豐稔之時亦當聽民閒自爲流通而程元章則奏稱嚴
禁躡麴買麴以致民間所收之麥所買之麴皆廢棄於無用之地

民甚不便等語今尹會一乃奏稱豫省食用全資小麥可見伊等
平時視穀麥等項爲無足重輕而一遇歉收則束手無策矣又有
以宣化府高粱爲苦澀不堪民食僅可供燒鍋之用者此皆未曾
經歷民間饑饉之苦而狃此安常處順之淺見也豫省上年秋成
頗豐今年麥收亦好不過以夏月被水偏災而民間卽匱乏若此
則平日官民之漫無經理可知一省如是他省自必相同此則朕
心所大憂也至尹會一奏稱比照江南之例減價收捐亦覺未協
緣江南通省上年被旱今年麥復歉收是以如此辦理夫捐監一
事原爲積穀而設今以偶爾偏災而輒思變通權宜之計恐將來
積穀之舉仍屬有名無實其所請穀麥兼收及不拘原額並許外
省來豫貿易之人一體報捐之處似屬可行著大學士會同該部
另行定議具奏總之膺封疆之寄者爲小民長久之計當豫籌於

平日不應拮据於臨時當加意於豐年不應猝辦於歉歲俾閭閻共知仰事俯育根本之所在中心樂從斯可以易俗移風漸臻康阜不愧父母斯民之任若必待朕每次降旨然後奉行於一時則平日之視爲具文可知儻一經奉旨卽嚴行查禁則又徒滋擾累於事何益將此通諭各省督撫知之○甲戌以完顏偉爲浙江按

察使

由河庫道遷

八月丙子諭本日御史張渭奏摺內稱皇上開言路於上而諸大臣塞言路於下凡奉旨交議事件並不平心和氣斟酌可否總以無庸議三字駁倒爲快甚且極口醜詆勝於怒罵意在箝小臣之口而不知剛傲恣肆已先失大臣之體等語張渭此奏實屬太過朕觀近日諸大臣能比古之臯陶稷契者固少而公忠爲國實心任事徇無可指摘之處或其中因循寬緩失之不及者亦不能保

其必無而如奏內所稱剛傲恣肆箝制言官之口者則實無其人
假如果有其人則言官皆受其箝制必不敢有人攻發其短今以
張渭至庸之人而見有此奏則無剛傲恣肆箝制言官之大臣可
知矣况朕御極以來用人行政事事躬親裁度一切是非情偽莫
不洞悉周知若如張渭所奏大臣中竟有阻塞言路蒙蔽擅權之
人不知彼意中視朕爲何如主耶又張渭奏稱傳爲訖請申法禁
一條九卿以爲賭博之禁未嘗不嚴見在步軍統領之番役五城
司坊之捕役日夕查拏將此議覆夫京城賭博盜賊等項未嘗禁
絕而小民徒受番捕嚇詐之擾累豈眾人共知而大臣獨不知且
主橐之司官亦皆不知等語凡查拏賭博盜賊之事原屬步軍統
領五城司坊之專責儻查拏不嚴或番捕有藉端擾累民聞者惟
在該督衙門留心懲究若因此而欲變更成例別無善策至於傳

爲詐條陳各款及九卿議覆之奏朕皆一一詳閱其原奏多屬通套浮詞並無切實可行之件九卿就事論事亦止可如此議覆又豈得謂有意駁詰阻塞言路耶又張渭奏內有臣工奏疏伏願宸衷乾斷之請自古設官分職原以佐理政務兵農錢穀各有專司朕以一身而萬幾待理祖宗數百年之章程國家千百條之規制不得不諮詢於大臣卽大臣亦不得不詳考典冊參酌古今非遂驟然可以見諸奏牘也若必欲盡出一人之意事至卽斷不交廷議無論勢不可行且於古聖人之詢於四岳咨十二人以亮天工者大相乖謬狂妄如張渭等輩不又將以朕爲專任己見而不博採眾論耶况朕於臣工章奏中見其確有可行者未嘗不卽降旨施行亦有廷議不行而朕諭令改正者悉皆審理於當幾而不設成見於先事九卿議駁言官之條奏張渭乃以爲極口讐詆

勝於怒罵而張渭於謹慎供職之大臣槩加剛傲恣肆阻塞言路之名所謂公道者安在乎張渭爲此狂瞽之奏顯係比附傅爲訛而薰染方苞造言生事欺世盜名之惡習此風斷不可長本應加以嚴譴以示懲儆姑念言官從寬免究特召見本日奏事之滿漢大臣面加曉諭咸令知之朕見臣工條奏尋常事件亦有介在可行可止之間而該部九卿議駁者事本微細而被張渭苛刻之彈章其所以致此之由亦當自愧然不可因此而生畏葸之心辦理公事總以理爲準此則朕之所厚望者○庚辰 上御經筵○辛巳諭編年紀事之體昉自春秋宋司馬光彙前代諸史爲資治通鑑年經月緯事實詳明朱子因之成通鑑綱目書法謹嚴得聖人褒貶是非之義後人續修宋元綱目上繼紫陽與正史紀傳相爲表裏便於檢閱洵不可少之書也今武英殿刊刻明史將次告竣

應倣朱子義例編纂明紀綱目傳示來茲著開列滿漢大臣職名
候朕酌派總裁官董率其事其慎簡儒臣以任分修及閱館編輯
事宜大學士詳議具奏○壬午敘張廣泗經理苗疆功加授三等
輕車都尉世職○以李鳳翥爲內閣學士由禁遷○甲申命河南瀕
河州縣修隄○庚寅江南金壇縣貢生蔣振生進手書十三經賜
國子監學正銜○增河南河工料價○壬辰命河南濬省城乾河
涯○癸巳以王恕爲廣東布政使潘思榦爲廣東按察使由糧驛道遷

○甲午諭凡補授道府等官於起程赴任時皆詣宮門請訓候朕
召見嗣後外省送部引見之道府亦著照此例於起身向任時詣
宮門請訓以便諮詢地方情形彼亦得各抒所見而朕益得悉其
人材矣○己亥禁各省運弁需索○癸卯諭自古帝王撫御寰區
惟以愛養斯民爲第一要務朕卽位以來仰體 皇祖 皇考勤

求保赤之聖心宵衣旰食偶遇水旱災傷真視爲己飢己溺百計經營散賑蠲租動輒數十百萬期登斯民於衽席此薄海内外所共知者無奈蚩蚩之眾頑樸不齊外省官員多言屢賑之後民情漸驕卽如今年江南地方初夏未雨卽紛紛具呈告賑是不以賑爲拯災恤困之舉而以賑爲博施濟眾之事矣更有一種刁民非農非商游手坐食境內小有水旱輒倡先號召指稱報災費用挨戶斂錢鄉愚圖領賑蠲賦聽其指揮是愚民之脂膏徒飽奸民之囊橐矣迨州縣踏勘成災若輩又復串同鄉保胥役捏造詭名多開戶口是國家之倉儲又飽刁民之慾壑矣迨勘不成災或成災而分別應賑不應賑若輩不能遂其所欲則又布帖傳單糾合鄉眾擁塞街市喧嚷公堂甚且凌辱官長目無法紀以致懦弱之有司隱忍曲從而長吏之權竟操於刁民之手刁民旣得濫邀則

貧民轉至遺漏是不但無益於國並大有害於民言念及此殊可
痛恨再者荒歲春冬之際常有一班奸棍召呼災民擇本地饒裕
之家聲言借糧百端迫脅苟不如願輒肆搶奪逆報官差緝累月
經年塵案莫結在刁猾之徒尚可支撐苟活而被誘之愚民多至
身命不保是災民不死於天時之水旱而死於刁民之煽惑又往
往然也今年下江淮北一帶及上江鳳潁等處多被水患河南水
災較甚山東直隸亦有被水之州縣著該省督撫董率有司將朕
諭旨通行詰誡如有犯者決不寬貸俾災民知有必邀之膏澤帖
然安釋而不致惑於浮言刁民知有難犯之憲章懔然畏懼而不
敢蹈乎法網則倉儲皆歸實用而閭閻共沐恩施庶不負朕早夜
焦勞愛養斯民之至意也將來地方旱潦不能保其必無該部可
行文各省督撫咸知此意一體遵行○以法敏爲盛京工部侍郎

九月乙巳朔署廣西提督譚行義奏報偵探安南國故王黎維禱
寵任妻舅鄭姓後有削奪鄭姓之意反爲所害三子俱逃入清化
潛住鄭姓立黎氏族姪維祐維祐卒又立族人維禱三世以來不
過空名本年三月內維禱次子黎鶯遣弟同國搬接母親家眷又
被鄭姓一併殺害是以清化鎮臣邵郡公同黎鶯起兵報仇占據
三府連敗鄭兵黎鶯見已稱王臣見在密飭通省官兵勤加操練
以觀動靜得旨所奏情節卽使俱係實情亦止可嚴謹疆宇以徐
觀其動靜耳○丙午免江南海州贛榆二州縣被水漕糧○己酉
免江南山陽縣額徵餘地租銀○庚戌孔傳煥因事解任調包括
爲江蘇按察使以趙城爲甘肅按察使由江蘇常鎮道還○癸丑命奉天
府府丞用科目人員○丁巳 上奉 皇太后謁 陵啓鑾○庚

申 上謁

昭西陵

孝陵

孝東陵

景陵奉

皇太后同鑾

○辛酉

上幸盤山

○貴州總督張廣泗奏屯戶築堡不領工價

上嘉良民知義仍賞工銀一萬五千兩

○辛未以德齡爲盛京工部侍郎由護軍統領遷常安爲盛京兵

后回宮

○辛未上奉

皇太

部侍郎

冬十月甲戌朔製 孔廟祭器爵一銅十六簋一籩一籩四豆四送關里陳設

○乙亥準噶爾台吉孟克率屬內附授爲三等侍衛

○丙子飭各省訓練駐防兵

○辛巳免直隸任縣漁稅

○癸未命

陝西發庫銀二十萬兩採買穀石

○甲申 端慧皇太子週年

上幸田村賜奠

○免福建建陽縣民欠並除匀丁銀米

○戊子諭

乾隆三年直隸地方歉收米價昂貴朕降旨准商賈等將奉天米石由海洋販運畿輔米價得以漸減今年四月閒以弛禁一年之

期將滿而直隸尚在需米之際天津等處價值未平又降旨寬限一年民頗稱便朕思奉天乃根本之地積貯蓋藏固屬緊要若彼地穀米有餘聽商賈海運以接濟京畿亦裒多益寡之道於民食甚有裨益嗣後奉天海洋運米赴天津等處之商船聽其流通不必禁止若遇奉天收成平常米糧不足之年該將軍奏聞請旨再申禁約○己丑宗人府議奏莊親王允祿與弘晳弘昇弘昌弘咬等結黨營私往來詭祕請將莊親王允祿及弘晳弘昇俱革去王爵永遠圈禁弘昌革去貝勒弘普革去貝子甯和革去公爵弘咬革去王爵諭莊親王允祿受皇考教養深恩朕卽位以來又復加恩優待特令總理事務推心置腹又賞親王雙俸兼與額外世襲公爵且畀以種種重大職任俱在常格之外此內外所共知者乃王全無一毫實心爲國效忠之處惟務取悅於人遇事模棱兩

可不肯擔承惟恐於己稍有干涉此亦內外所共知者至其與弘
晉弘昇弘昌弘咬等私相交結往來詭祕朕上年卽已聞之冀其
悔悟漸次散解不意至今仍然固結據宗人府一一審出請治結
黨營私之罪革去王爵並種種加恩之處永遠圈禁朕思王乃一
庸碌之輩若謂其胸有他念此時尙可料其必無且伊並無才具
豈能有所作爲卽或有之豈能出朕範圍此則不足介意者但無
知小人如弘晉弘昇弘昌弘咬輩見朕於王加恩優渥羣相趨奉
恐將來日甚一日漸有尾大不掉之勢彼時則不得不大加懲創
在王固難保全而在朕亦無以對皇祖在天之靈矣弘晉乃理
密親王之子皇祖時父子獲罪將伊圈禁在家我皇考御極
敕封郡王晉封親王朕復加恩厚待之乃伊行止不端浮躁乖張
於朕前毫無敬謹之意惟以謁媚莊親王爲事且胸中自以爲舊

日東宮之嫡子居心甚不可問卽如本年遇朕誕辰伊欲進獻何所不可乃製鸞黃肩輿一乘以迎朕若不受伊將留以自用矣今事迹敗露在宗人府聽審仍復不知畏懼抗不實供此尤負恩之甚者弘昇乃無藉生事之徒在 皇考時先經獲罪固禁後蒙赦宥予以自效之路朕復加恩用至都統管理火器營事務乃伊不知感恩悔過但思暗中結黨巧爲鑽營可謂怙惡不悛者矣弘昌秉性愚鈍向來不知率教伊父怡賢親王奏請圈禁在家後因伊父薨逝蒙 皇考降旨釋放及朕卽位之初加封貝勒冀其自新乃伊私與莊親王允祿弘晳弘昇等交結往來不守本分情罪甚屬可惡弘普受 皇考及朕深恩逾於恆等朕切望其砥礪有成可爲國家宣力雖所行不謹由伊父使然亦不能卓然自立矣弘咬乃毫無知識之人其所行爲甚屬鄙陋伊之依附莊親王諸

人者不過飲食譙樂以圖嬉戲而已莊親王從寬免革親王仍管內務府事其親王雙俸及議政大臣理藩院尙書俱著革退至伊身所有職掌甚多應去應留著自行請旨將來或能痛改前愆或仍相沿錮習自難逃朕之洞鑒弘晉著革去親王不必在高牆圈禁仍准其鄭家莊居住不許出城其王爵如何承襲之處著宗人府照例請旨辦理弘昇照宗人府議永遠圈禁弘昌亦照所議革去貝勒弘晉著革去貝子並管理鑾儀衛事甯和以獲罪之間散宗室因詔媚莊親王王遂奏請與以恩賞伊所得之公爵今既照宗人府議將此公爵革退則甯和在所當革著詢問莊親王若願改令弘晉承襲則著以鎮國公管都統事若仍欲令甯和承襲則弘晉專任都統之職著王自行奏聞弘暉本應革退王爵但此王爵係 皇考特旨令其永遠承襲者著從寬仍留王號伊之終身

永遠住俸以觀後效朕於天潢支派念一本之親皆欲篤厚而成就之伊等若能仰體朕心循理謹度共受國恩實乃朕之至願儻恃恩放縱已露端倪而隱忍姑容不加裁抑則深乖小懲大戒之義將來難以從輕完結殊非防微杜漸先幾保全之道也至於宗室諸人彼此聯親親之情亦須嚴公私之辨若果出於公心則廓然大同無比附之迹豈不甚善今以數人私意綱繆暗地往還尙得爲親親之正理乎朕之所以待莊親王與王之所以事朕者天下自有公論王試自思之亦知愧赧否也在朕臨御天下固不敢以親親之一節而忘國家之大法而宗室諸臣亦當知國家之法在所必行若不知儆惕身陷法網朕雖欲敦親親之誼亦斷不能寬假也將此並傳諭宗室等知之○庚寅以劉柏爲安徽按察使

候補
察使

○癸巳吏部給事中倪國璉奏進浙江錢塘縣監生陸曾

禹救饑譜四卷命交武英殿刊刻○甲午雲南總督公慶復奏審
明交賊矣長等起事投誠情罪緣由請將矣長等交安南國王發
落得旨安南係本朝屬國今既將矣長等情罪審明即可定擬完
結該督復請送交該國王自行發落殊未妥協此案或卽行辦理
或少待該國事定報聞之後再行定議著軍機大臣等議奏尋議
交賊矣長等畏懼官兵又見告示許其陳訴率眾來投旣經審明
卽當治以應得之罪方合天朝爲屬國處分叛人體統且前經該
督等出示榜文有許以不死之語若仍送至彼國勢必盡誅則督
鎮大臣未免失信應令該督等卽按例分別定擬請旨發落仍將
矣長等治罪之處咨該國王知之得旨依議○丙申釋馬蘭泰於
獄○丁酉以外豐收命撥庫銀二萬兩採買候撥○辛丑申諭
山東河南清查盜藪○命盛京工部侍郎法敏赴北路軍營管理

糧餉○王寅封弘曄爲郡王襲理親王爵○莊親王允祿請仍以甯和襲封鎮國公允之○癸卯上幸南苑行圍

十一月甲辰朔增武會試內外簾官○丙午上行大閱禮發五矢皆中的賜在事王大臣銀幣有加○戊申那蘇圖丁憂以郝玉麟署江南總督由吏部尚書署○庚戌御史宮煥文參奏河南巡撫尹會一疲玩不振請另簡賢員諭尹會一自任豫撫以來屬員怠忽不知畏懼其讞獄弭盜多未妥協今年豫省各屬被水災重所辦賑恤之事亦未盡善實少幹濟之才不勝巡撫之任但其人忠厚謹慎非有心誤公者可比著解任來京候朕降旨另用河南巡撫員缺著兵部侍郎雅爾圖補授至於國家設立言官原期公直敷陳有裨政治不得摭拾浮詞妄逞私意若內外大臣中確有劣迹應入彈章者指實參奏方爲無忝厥職御史宮煥文所參尹會一之

處皆朕所洞悉並非別有私心甚屬可嘉著交部議敘具奏_尋議
紀錄二次○壬子安徽巡撫孫國璽卒賜祭半葬○以陳大受爲
安徽巡撫由吏部右侍郎遷○癸丑除浙江仁和錢塘二縣虛額丁銀○
賜朱秋魁等一百一十一人武進士及第出身有差○己未諭朕
慎重刑獄罪疑惟輕數年之中屢頒恩詔凡有應行赦免之犯俱
已在三宥之中矣其不在恩詔中者復於乾隆二年三年特降諭
旨令大臣會同刑部將秋審朝審造冊詳加覆勘如有一綫可原
應行減等者酌定奏聞請旨減等發落此次辦理外其未經減免
者皆情罪較重之犯因係久緩不復出決卽令終斃囹圄已屬寬
典無可矜憐但此等人犯淹禁既久積案日多朕再四思維清理
滯獄亦法外之仁著九卿等將秋審朝審緩決五次以上之人犯
酌其情罪稍輕尙可貸以生路者逐一分別請旨比照允益免死

減等之例充發邊遠煙瘴地方如此辦理較之可矜減等流杖之
例爲重而較之永遠監禁之犯爲輕是亦清理滯獄之意至情罪
可惡者雖經多次緩決亦不在減免之例○諭朕聞湖北地方每
年額徵糧米二十七萬八千餘石以十五萬一千餘石運赴通倉
名曰北漕以十二萬六千餘石爲荊州官米名曰南漕此二項糧
米雖有不同而納之於官徵之於民則同一乾圓潔淨之米卽額
定之耗米腳價亦屬一例原可合收而分解者乃有不肖州縣巧
爲多取分設倉口分點倉書令糧戶分作兩處完納以圖多得廩
餘民聞未免苦累近年以來上官訪知此弊已出示革小民稱
便但未著爲定例恐將來官吏貪得贏餘仍有復蹈舊轍者著該
部行文該省將南北二項漕糧合收之處永遠遵行如有分項徵
收零星多取者該督撫卽行查參儻別省收漕地方有似此分收

著該督撫酌量查禁○庚申調田懋爲吏部侍郎以王安國爲
刑部侍郎尹會一爲左副都御史○辛酉諭各處河工關繫緊要
而通曉河務之大員甚爲難得朕爲此留心久矣雍正十一年高
斌管理鹽政時 皇考曾降旨令其講究河工事務以期熟練備
用今果得其力朕聞河南布政使朱定元由河南廳員出身歷任
浙江海防兵備道於河防事宜素所閱歷今任豫省藩司所有河
道地方皆其統屬而山東爲河南下游事屬一體著朱定元將疏
濬保護之法加意講求以備將來之任使但不必協同辦理有妨
本任職掌浙江按察使完顏偉亦曾任海防道員其浙江海塘事
務亦照朱定元之例不時留心該部可卽行文傳諭朱定元完顏
偉知之嗣後道府大員引見時若有曾任河員及諳練河務者著
於履歷內註明啓奏○辛未諭已故大學士嵇曾筠前在江南河

道總督任內悉心籌畫殲力宣防疊沐 皇考諭旨褒嘉至今河渠受益查前任河臣靳輔齊蘇勒俱建有祠宇永享禋祀特曾筠勞績實可媲美兩人著照靳輔齊蘇勒之例一體祠祀以示優獎以慰輿情

十二月癸酉朔諭額駙策凌至京入觀朕諭以噶爾丹策零送羅卜藏西瓦還時曾告以車臣汗妻子見在此聞若車臣汗念之我當送還據額駙奏稱臣世世受恩深重前準賊入我游牧據二子及使婢一人而去若等應卽自盡以報國恩至今苟且偷生尙在彼處居住全不知恥臣欲得此不肖之子何用且與國事無益噶爾丹策零性本詭詐若臣欲得二子彼必不諭可否妄行干請所開非小國事爲重臣斷無念子之意輸誠具奏夫父子之道闢乎天性額駙策凌感激 皇祖 皇考及朕之恩止圖裨益於國家

顧惜大義不思復與其子相見朕心深爲惻然思有以獎之其長
子貝子成袞扎布漢仗好在軍前亦頗效力著加恩封爲世子○
諭四執事總管首領將太監李蟠放假四五日往弘晉處將宮內
之事信口傳說太監等告假不過一日兩日豈有四五日在外之
理已將四執事總管首領查明議罪爾總管等曉諭旗下太監等
既已身離旗下復往何爲見今將李蟠夾訊卽是榜擇再旗下太
監不可在近便隨侍等處當差止宜外圍燒火打掃處服役過十
數年試看果好再往內圍挑補尋又諭見今隨侍等處旗下太監
不必更換此內有不堪者酌量革退以後新進旗下太監不許留
在近處當差○戶部議覆江蘇巡撫張渠奏武進陽湖二縣役田
租銀原因明代白糧責成糧長里民運送苦累不堪後經巡撫捐
銀買田除完辦條漕外另收租銀以抵白糧募船水腳之用我朝

糧由官運此役租遂歸白糧經費裁存項下充餉在當時置買此
田止令民間領價認租並未開報實在田畝遂有無田領價有田
私賣以致日久無著後因迫於清查凡有戶可追者暫將已田開
抵其無戶可問者卽將租銀攤派圖里認賠請將前項無著田租
銀八百十二兩零全行豁除以甦民困應如所請照數除免至見
存原置役田從前原係官置其開抵民田一項亦係領價未買均
非無著可比今該撫請減半徵收未便議准應令於承辦條漕外
照額徵租以濟公務從之○甲戌諭各省安輯流民○丙子免浙
江安吉等縣上年漕糧○戊寅諭宗人府福甯首告弘晳一案經
平郡王公訥親一一審訊內有弘晳聽信安泰邪術捏稱祖師降
顯一款詢問安泰據供弘晳曾問過準噶爾能否到京天下太平
與否及皇上壽算如何將來我還升騰與否等語口供確鑿殊無

大逆不道應照例革去宗室擬絞立決其家產妻子應如何辦理
之處交宗人府議奏莊親王將官物私自換與弘晳應照監守自
盜律革去王爵准徒五年係宗室交宗人府完結安泰造作妖言
談論國事擬以立絞餘俱按律定擬弘晳父子在 皇祖時身獲
重罪我 皇考御極屢次加恩封爲親王朕卽位以來又復恩待
乃伊並不知感妄以伊父係舊日東宮心懷異志密與莊親王等
交結往來前經敗露宗人府擬以革去王爵永遠圈禁朕從寬但
革親王仍准在鄭家莊居住並將伊弟弘晳襲封郡王以繼理密
親王之後今弘晳聽信邪說其所詢問妖人之語俱非臣下所宜
出諸口所忍萌諸心者擬以大逆重典以彰國法洵屬允當但朕
總念伊係 皇祖聖祖仁皇帝之孫若革宗室置之重典於心實
有不忍且伊亦不過昏庸無知之人耳著從寬免其死罪但不便

仍留住鄭家莊著拏交內務府總管在景山東築圍永遠圈禁其
家產妻子不必交宗人府另議伊子仍留宗室但亦不便仍在鄭
家莊著來京交與弘曄管束莊親王從前種種朋比黨援之事所
犯甚大朕已經寬恩免革王爵今侵盜官物之案在王亦以爲尋
常之事耳伊亦不必革去王爵但罰親王俸祿五年以示懲儆令
王反而自思其所庇護乃如此妄亂之人伊尙覲顏不知愧恥乎
安泰係附和弘曄捏爲邪說之人著從寬改爲應綏監候秋後處
決餘依議從前弘曄等朋比往來之事朕命宗人府審奏時已燭
其有不軌之心因事未顯著是以從輕歸結以見小懲大戒之意
彼時無知之人未必不以朕之處分爲太過今其悖逆之行彰明
較著而朕乃復貸其重罪止於禁錮天下之人亦當曉然於弘曄
之所犯法無可宥而朕之所以處之者始終念親親之誼也况數

年以來弘晳不過隨班上朝並未辦理公事朕於彼無絲毫喜怒
之成心伊之居心行事如此豈非自作之孽乎且弘晳前案已經
結局卽福甯所首之款亦未嘗及此悖逆之語而安泰於審問之
時一一供出豈非天理有所不容 皇祖 皇考在天之靈昭鑒
而使之敗露乎朕臨御以來敦睦一本加恩九族逾於常格不獨
眾宗室知之卽內外臣工無不知者乃朕如此加恩而近支之中
竟有如弘晳等悖亂之徒不能感動其天良朕轉用以自愧至於
眾宗室見朕從寬優待益當思國法之不可犯循理守分承朕
寬厚之恩至若觸法祇禁如弘晳之行爲朕雖以不忍之心從寬
發落而究未嘗廢棄國法也將此並諭眾宗室知之○己卯諭爲
政之道莫先於勤朕日理萬幾惟日孜孜不敢暇逸朕旣恪恭於
上亦必須諸臣鼂勉於下庶交修不逮疏忽之漸無自而萌近見

各部院辦事尙屬秉公但所奏事件較少於前從來政簡刑清原屬國家上理若未能臻上理之實效而徒務清簡之虛名必致將應辦事件日就廢弛矣凡朕御門聽政辦事色而起每遣人詢問諸臣曾齊集否數次之後始云齊集卽今日亦復如是諸臣於御門奏事尙且遲遲後期則每日入署辦事更可想而知自古人君未明求衣聞雞問政人臣夙興夜寐靖共爾位堂廉之間動色相戒誠以勤怠之關卽敬肆之所由判也凡人之心敬難而肆易敬則日習於勤勞肆則日流於安逸心果克勤則雖無事可辦亦不失敬事之意若心圖安逸則雖當事之際亦不過視爲具文耳朕非因諸臣齊集稍遲卽加責備但破肆之介不可不謹其幾書曰君子所其無逸又曰無曠庶官朕與諸臣嘗共勉之○普泰以偷安革職以舒赫德爲兵部右侍郎由左副都御史遷○庚辰免陝西榆林等十

州縣逋賦○辛巳庚親王巴爾圖等議奏弘晳大逆不道乞正法
以彰國憲弘晳妻子請照例革去宗室爲民交該旗辦理其與弘
晳結黨之莊親王允祿請仍照原議革去王爵諭王大臣所奏甚
是弘晳情罪重大理應卽置重典以彰國法但朕念伊係 皇祖
聖祖仁皇帝之孫若加以重刑於心實有所不忍雖弘晳不知思
念 皇祖朕甯不思念 皇祖乎從前阿其那塞思黑居心大逆
于犯國法然尙未如弘晳之擅敢倣照國制設立會計掌儀等司
是弘晳罪惡較之阿其那輩尤爲重大但阿其那塞思黑尙屬小
有才之人若弘晳乃昏暴鄙陋下愚無知之徒伊從前所犯罪惡
俱已敗露見於東菴圖永遠圈禁是亦與身死無異凡稍有人心
者誰復將弘晳尙齒於人數乎今旣經王大臣如此奏請則弘晳
及伊子孫未便仍留宗室著宗人府照阿其那塞思黑之子孫革

去宗室給與紅帶之例查議具奏至莊親王前與弘晳私相往來種種重罪俱經寬免今將官物私行抵換在王亦以爲尋常之事何足較論著仍遵前旨行○壬午準噶爾台吉噶爾丹策零遣使哈柳等奉表至京表曰噶爾丹策零謹奏 大皇帝前哈柳至奉大皇帝敕書云休兵息民永歸和好卽定界與否亦非要事誠使厄魯特不得過阿爾台山梁喀爾喀游牧亦無過扎卜堪庶幾彼此游牧隔遠如此定議俟回奏到日朕再降諭旨令喀爾喀等遵守事體聲名均有裨益竊思向來阿爾台爲厄魯特游牧杭愛爲喀爾喀游牧原無隙隙今誠廣教安民堅守舊約原不在定界與否前已再三陳請今蒙 大皇帝鑒尤不勝懼忭卽此爲定又蒙 諭旨卡倫係我 皇祖 皇考時安設仍應如舊其科布多所在不復駐兵每年止遣二三十人前往略地斷不致彼此相害

互有牽制已降旨爾使哈柳甯有改悔如此則我心亦不疑托爾和布延圖兩卡倫自不妨仍舊矣又 大皇帝諭旨有云朕不阻奉教之人往者爾等潛往西藏殘害土伯特今遽經行彼地恐土伯特懷憤生事果誠心往藏布施俟遵朕旨定議後許用百人赴藏朕特遣官弁護送按前此起釁發兵騷擾是實今一意尊敬黃教斷不致生事但駛載什物百人不敷乞許用三百人至貿易之事令哈柳面懇允行並隨表貢貂皮三十一張奏入報聞○甲申禮部議駁湖北巡撫崔紀奏孟子稱陳良悅周公仲尼之道又稱爲豪傑之士請從祀 文廟查從祀先賢先儒或當時親承私淑證道統之淵源或後來羽翼經傳實有功於聖學故列於兩廡以光祀典陳良孟子所載因闢許行責陳相而偶舉其師其生平行誼無考又無著述可傳未可遽入聖門弟子之列應毋庸議從之

○乙酉諭西藏貝勒頗羅鼐遵奉諭旨敬信黃教振興經典練兵
防卡甚屬龜勉著加恩晉封郡王○丙戌大學士鄂爾泰等會議
僉都御史陶正靖奏北嶽恆山順治初於直隸曲陽縣祭十七年
因臣下之請移於山西渾源州祭廢數千年相沿之典而從流俗
附會之說所宜詳訂等語臣等謹按 欽定書經傳說彙纂內北
嶽恆山小註載地理今釋云北嶽禹貢作恆山在今大同府渾源
州南二十里接直隸正定府界案恆山自班固漢志載於上曲陽
而酈道元水經注以下咸宗之然今曲陽縣治距山一百四十里
不若渾源州之近我朝自順治十七年釐正祀典參考輿圖移祀
渾源山靈妥侑誠宜率由舊章不必更議又奏康熙六十一年增
祀前代帝王百四十有三名臣四十當日禮臣未能詳繹 聖祖
仁皇帝諭旨故所增祀者尙有未當亦尙闕略等語臣等參考經

史公同詳議如所稱夏王孔甲商王祖甲史記譏其淫亂但史記雜採諸家原有未可盡信者如夏王孔甲象龍鑄劍雜見他書別無荒淫之蹟至祖甲爲商賢君書經無逸篇謂能保惠於庶民後之論者自宜援經以正史不應執史以疑經周悼王立未踰年國遭多難左傳並無見害於子朝之文西漢之元成東漢之桓靈以及唐宋之季雖政教式微但蒙業而安猶然共主明武宗除寢濠殛劉瑾尚能任用賢才不得以神熹並論臣等伏思見在增祀諸帝王仰荷 聖祖仁皇帝 世宗憲皇帝欽定毋庸復有損益至稱唐之憲宗雖不克正終然有中興之功當以明憲帝爲比查憲宗削平方鎮力致中興唐之威令幾於復振但任用非人殞身宦寺是以 聖祖仁皇帝增祀愍帝而不及憲宗也又稱魏之孝文周之世宗卓然一代令主國家每遇大典專官祭告而廟祀缺焉

毋乃自相繆戾等語查魏孝文周世宗勤於爲治留心邦本可稱
令主但偏據一方從前定議俱不與從祀至每遇大典專官告祭
所以著六朝後五代未有如二君之賢者義各有歸應將該僉都
御史所奏增祀未當及闕略之處毋用議又稱從祀諸臣遺漏最
多等語臣等伏思名臣應運代生祀典尊崇禮宜詳慎故虜室九
官工垂不與若商之伊陟臣扈巫咸巫賢甘盤周之閟天泰顯散
宜生南宮括載在尙書人所盡曉而當日增祀未經議及他如令
德孝恭若君陳世篤忠貞若君牙均不在列實緣人才之盛難徧
及也東漢第五倫奉公盡節載於記傳但漢代如宋宏卓茂袁安
魯恭輩行義俱與倫相上下未可槩從議增魏之高允無論已若
唐魏徵宋王旦元耶律楚材明王恕楊廷和等皆有可稱之實而
祀典不及蓋於同時同列中較德量功取彼遺此誠難其人而重

其事也應將該僉都御史所奏從祀諸臣再加詳訂遺漏之處毋庸議又稱禮書例內正俗一條整齊教化每見臣庶之家簡於祭祀侈於婚喪請飭部通行各衙門傳知屬員並候選進士舉貢凡本處習俗悖理傷財之事許據實開送到館部臣纂修官會同商酌若所費無多於理未悖者姑從獵較之義其一切傷化耗財等事彙奏飭禁載入禮書犯者以違制論等語臣等竊惟 皇上特諭儒臣編輯禮書務使羣黎百姓易知易行誠宜去奢從儉大爲之防以整齊而教化之應如所奏飭部通行辦理從之○己丑頒

聖祖仁皇帝御製文集

世宗憲皇帝御製文集並

御纂諸

經於宗學○庚寅以阿里衮爲兵部右侍郎

由副都統遷

希德慎爲左

副都御史降調盛京工部侍郎○辛卯特授原任大學士朱軾子翰林院庶

吉士朱璉爲檢討○壬辰準噶爾夷使哈柳等入覲諭曰爾台吉

噶爾丹策零奏章朕已觀覽悉遵諭旨朕深嘉與之朕爲中外共
主惟思與普天之下共享昇平今噶爾丹策零卽遵朕旨定界嗣
後近邊居人各安故土更無爭競永遠安生矣至所請進藏熬茶
乞用三百人朕已允行至貿易之事朕命大臣與爾定議去年爾
來今年又至克成和好爾與有榮施朕向欲加恩於爾爾初到時
卽欲命爾進見因聞爾有足疾故至今日始令入覲爾善自調理
近年節時朕再令爾入朝○是歲朝鮮來貢